



00222

唐文拾遺卷之三十三

榮祿大夫三品頂戴前分巡廣東高廉道加四級事陸心源輯

張禕

禕昭宗時歷官兵部尚書舊書有傳

南龕題名記



聖上西巡之辰余自金門飛騎追扈大駕中途隔烟塵遁跡及中秋方達行在由青瑣判吏視事未浹旬復歸內署明年自貳口授是官又明年出縮是職奉命先鑿輅之神都俾緝舊綱行次口缺遇軍變乃間道俟通於茲郡缺是塵清路遂山秀川明方與缺博

卷三十三

一

酣於臨眺忽有賚函而登缺出天書以示促赴行朝

將缺是境得無紀焉表兄巢湖處缺薛瓚前進士封

舜卿姪曙同缺中和四年甲辰三月八日尚書右丞

判戶部張禕記時為姪曖等修釋迦像遂刊於此石金苑

戴師顥

師顥僖宗時人

戴府君墓誌 并序

府君諱芳魯國郡人祖諱蔽父諱素府君素之第四子娶東海徐氏育子五人二女三男長子師顥次子

師旭少子師敏府君溫良恭儉讓志惟清雅惟孝惟
忠琴酒戴不仕何圖積善無徵凶豐春秋六十有三
寢疾醫藥無效大化有終中和三年秋八月廿五日
終至其年季冬之月初五日丁酉吉辰窆爲吳郡東
南華亭縣北廿二里去張管墩五里莞沼鄉城山里
進賢村洞涇西一百卅步新宅之東南而葬新塋禮
也三男泣血二女哀號長子師顛等恐歲月久遠陵
谷變移不託時世今乃刊巒爲記銘曰

晚暉西落流水東馳存亡永訣逝者無歸萬古千秋
墳壠巍巍 是誰書雙鯉魚是誰讀雙白鶴鯉魚入

卷三十三

二

深泉□□□□□□古刻
叢鈔

李景莊

景莊乾符中刑部侍郎

應配流人就近奏

配州府流人流刑三等流二千里至流三千里每五
百里爲一等准律諸犯流應配者二流俱役一年稱
加役流三千里役三年役滿及會赦免役者卽于配
所從戶口例今後望請諸流人應配者依所配里數
無要重城鎮之處仍逐罪配之准得就近唐會要
四十一

高駢

全唐文八百二有傳

尋訪褚遂良後裔護喪歸葬奏

愛州日南郡北五里有故中書令河南元忠公褚遂

良墓前都護崔耿大中六年因訪邱墳別立碑記云

顯慶三年歿于海上殯于此地二男一孫耐焉伏乞

尋訪苗裔護喪歸葬

唐會要四十五

致周寶書

伏承走馬已及奔牛今附薑一瓶葛粉十斤以充道

路所要

南鄧新書

逐西川僧法進判

卷三十三

三

斷臂既是凶人刺血必非善事貝多葉上不許塵埃

俗子身中豈堪腥膩宜令出境無得惑人與一繩遞

出東界

北夢瑣言

司空圖

全唐文八百七有傳

李公確行狀

公有出倫之才為時輩妬忌懼於非橫其平生著文

有百家著諸心要文集三十卷品流誌五卷易之心

要三卷注論語一部明無為上下二一作篇義說一

篇倉卒之辰焚於賊火時人無所聞也惜哉陽春白

雪世人寡和豈虛言也

北夢瑣言

全唐文八百八有傳

欲慕平交妄希抗禮何異持衡秤地舉尺量天越竊

新州牂牁故地不在周封之內非居禹跡之中曩日

邊將邀勳妄圖吞併得之如手加駢拇失之若頷去

白宏儒

全唐文八百十六有傳

卷三十三

四

請廢諸太子廟附莊恪廟奏

按此奏見唐會要卷十九今存其目文與全

唐文白宏侯作同不錄

黃璞

全唐文八百十七有傳

觀察使檢校司徒兼御史大夫陳巖墓誌

府君以大順三年薨春秋四十四江夏黃璞為名士

傳以伸之又為神道碑以明之府君諱巖字夢臣曾

祖父諱宏字文保為當府司馬王父諱好古贈太子

舍人父諱簡字言史贈工部尚書又贈羽林大將軍

太夫人贈會稽郡太君又贈衛國太夫人府君幼而
徇齊不爲兒弄長逢離亂思埽妖氛登□則神鬼宵
奔揮劍則機槍星落廉使榮陽公鑑夙慕英風累咨
□畫請爲都團練副使仍判清源又三發疏章請□
交代滎陽公尋告疾北歸公威以肅衆寬以撫□賣
刀佩犢再揚冀遂之風左詔右絃大闡文翁之化合
浦靈珠皎□光於五夜漁陽瑞麥吐秀色於連年家
家吟多禱之謠處處誦如坻之什朝廷嘉歎就加工
部尙書兵部尙書才幾又加右僕射左僕射不二年
又加司空噫雖則委珠道著益彰衣錦之榮然而治
水功成未捧陶鈞之命甘棠勿翦講樹空存哀哀生
靈何嗟及矣夫人錢塘范氏出自令門婦於華族□
垂範於金閨驟霑榮於石窈非惟敦敬孝悌多奉以
家規至於恤物愛民亦得於內助□封錢塘郡夫人
有六子長曰延晦太子司議次延□一子出身守閩
縣尉次延冕陸王府參軍次□□次延曦皆秀掩稽
松茂踰緒柳儼然在疚柴毀踰禮吾知聚星之德其
未艾矣有女二人長適□判滎陽公□適太子正字
董承和卽浙東廉問相國之令子孫男三人長曰肇
任長樂縣令次曰□檢核工部尙書守漳州刺史兼

御史大夫材質豐傑宇量沈厚府君以景福二年八月十四日瘞於閩縣敦業鄉太平里□□山之陽銘

曰

大滂仁化蘇凋俗生植霑如膏雨沃方嘉九年重戴

天豈□一旦□□□閩山上閩山足佳城鬱鬱松阡

福建通志

綠逝者徒云可□錄

全唐文八百二十九有傳

高公自草墓誌

寓于東吳與吳郡陸龜蒙爲詩論之交一紀無踰龜

卷三十三

六

蒙卒爲其就木至穴情禮不缺其後卽故諫議大夫

高公丞之故丞相陸公辰二君於蕘至死不變其餘

面交皆如攜手過市見利卽解攜而去莫我知也復

有吏部尙書薛公貽矩兵部侍郎于公兢中書舍人

鄭公撰三君子者余今日已前不變不知異日見余

骨肉孤幼復如何哉

北夢瑣言

鄭谷

谷字守愚宜春人光啓三年進士乾甯中仕至都官

郎中

雲臺編序

谷勤苦於風雅者自騎竹之年則有賦咏雖屬對聲律未暢而不無旨諷同年丈人古川守李公朋同官丈人馬博士戴嘗撫頂歎勉謂他日必垂名及冠則編軸盈笥求試春闈歷于於大匠故少師相國太原公深推獎之故薛許昌能李建州頗不以晚輩見待預於唱和之流而忝所得爲多游舉場凡十六年著述近千餘首自可者無幾登第之後孜孜忘倦甚於始學也喪亂奔離散墜略盡乾寧初上幸三峯朝謁多暇寓止雲臺道舍因以所記或得章句綴于牋毫或得於故侯屋壁或聞於江左近儒或祗省一聯或

卷三十三

七

不知落句遂拾墜補遺編成三百首分爲上中下三卷目之爲雲臺編所不能自負初心非敢矜於作者

康駢

駢字駕言池陽人乾符四年登進士第官至崇文館校書郎

劇談錄序

駢咸通中始隨鄉賦以薄伎貢於春官爰及竊名殆將一紀其閒退黜羈寓旅平秦旬洛師新見異聞常思紀述或得史館殘事聚於竹素之間進趨不遑未暇編綴及寇犯天邑挈歸漁樵屬江表亂離亡逸都

盡景福乾寧之際耦耕於池陽山中閉關雲林罕值
三益而又環堵之內闕於墳典思欲叙他日之遊談
迹先王之軌範不可得矣然則平昔之道本爲於文
旣未能立匡世之功名又安得舍窮愁之翰墨因想
時經喪亂代隔中興人事變更邈同千載寂寥埋沒
知者漸稀是以耘耨之餘粗成前志所記亦多遺漏
非詳悉者不復叙焉分爲二編目之曰劇談錄文義
旣拙復無雕麗之詞亦觀小說家流聊以傳諸好事
者乾寧二年建巳月池州黃老山白社序

足本劇談錄

蔡德章

卷三十三

八

德章廣明時人守藤州刺史持節藤州諸軍事

唐故朝議郎前行宣州南陵縣尉柱國張府君

墓誌銘 并序

夫銘者稱其美也記歷年代載標行德因夫子讖秦
始皇後必開發吾墓顏回以下乃誌讖詞於墓內使
始皇見之知我先師聖焉又至後漢滕公夏侯嬰將
葬佳城駟馬不進而鳴乃掘其下遇有穴室中得石
記亦有讖文是以先王製禮勒石于泉慮陵谷有遷
以明柩之德位也公名師儻其先清河人也曾祖景
仁祖昊父南素並不仕公卽家任之子也器宇凝正

容範端華檢性依方飾躬山禮進身而先物約已而
厚人言合詩書動遵法式自少小以勤學苦節而立
其身始自牙府從職能以幹敏奉公前後憲長無不
委用或以糾繩之政而立紀綱或竭節推刑爲霜臺
之領袖優滿授坊州昇平縣主簿秩滿授宣州南陵
縣尉兩任之政恪著公勤太守常以重難而委寄也
邑人遵凜惕懼於製錦之威賦稅及期一境無逋懸
之縛旣之罷任方欲歸輦荏苒未進適值浙江淮海
等道而多寇逆所在徵兵憂以路虞不通且駐宣城
之側以乾符五年七月初遘疾至其年八月一日終

卷三十三

九

于宣州權居之所享年七十有二時第三男溥自京
侍從至南陵數載不曾暫闕晨昏侍疾求鑿而忘寢
食公歿之後護喪歸京涉歷山河皆口塗步周迴委
曲三千餘里二百餘晨方達家邑孝道之志此男偏
孫曾參之儀抵之此也公之先域在於馮翊近載緣
諺子從職多在諸方南北駢馳離鄉日久遂逐便移
家於上都崇仁之里靈蕙之禮備之于堂以廣明元
年十月五日乙酉吉辰歸葬於萬年縣寧安鄉新塋
之禮也夫人王氏以其精糠之情饗祭從便阻以地
遠恐後違時不赴馮翊舊鄉慮其子孫闕春秋之祀

而從近焉乃卜新阡在鳳樓原也防其異日無虧灑掃之儀子孫團圓不墜松楸之主伏以賢夫人太原大族之家引駕王公魯之女也懷敬姜之志襲梁鴻之風嘗以內循機筭之勤外豐賓客之膳親族仰重四德不虧有男四人長曰洙見義武軍節度都押衙銀青光祿大夫檢校國子祭酒前隴州長史兼御史中丞屬以時當沙陁悖亂逆臣李國昌侵逼邊陲節度使王公知洙有韜略之機籌筭之握委領兵士剪伐羗戎果搜收復鎮城招攜戶口上聞帝闕表以殊功卽領郡符必酬前効不久之際新命當臨公之此

卷三十三

十

子光前絕後迺是德章外甥女習備孰德行請以爲誌次子曰汾見豕府從宦而有出羣之藝主執奏章頗立勤効卽有榮遷次日溥乃是侍從南陵無虧晨省護喪計邑不憚苦辛亦非久必榮家族也次日溥與義武軍節度王公弟左神策軍糧料使弘紹同勾當供軍之務並各負凌雲之氣皆懷孝道之心盛德出於眾人光顯彰於前代有女一人娉同州押衙王袞尋終遐壽袞及女孫恣在兒孫二人長名難胡卽男洙之子也年未弱冠亦是成器之寶豹澤貴顯之材次日周兒乃是溥之子也見在襁褓孫女二人長

適高翽守職鸞臺之內官授中郎之榮次女阿宜
□及笄公時當盛族年至從心雖歿殊鄉得歸帝里
四男泣血一婦摧傷備舉哀歌靈儀崇列丹旒攸攸
送歸新闕嗚呼水無返注日不東迴泉門旣掩承而
不開刻石爲銘乃爲頌曰

温温府君令德出羣其聰莫比其孝有聞冲和茂著
節操松筠兩佐名縣頗立殊勳方欲竭効遽有替人
罷秩之後偶染疾身豈期倏忽異□之魂哀哉上蒼
何至于恠行善云吉豈降其殃離京之日骨肉斷腸
不料永隔生死分張號天□及叫地空傷卜其宅兆

卷三十三

十一

遷赴立堂蕭蕭松柏杳杳白楊泉臺將掩隴樹無光
葬於新闕永鎮龍崗

石刻

鄭貽

貽昭僖間人

鹿門詩集叙

并山川英淑奇麗當塞阨之衝古多豪士事武功健

馬垂光字內未有鉤錦

編一作秀

絕擅聲詞翰者君出

其中翕輕清以爲性結冷汰以爲質煦鮮榮以爲詞
偏於逸歌長句駿奔蹕厲往往而劇李白杜甫死非
君而誰哉君諱彥謙字茂業咸通二年進士以文章

入仕操官履潔如其爲文晚從王重榮辟從事河中
歷薊絳諸州刺史所至有能績光啓七年隱居鹿門
山以著述爲任與施肩吾希聖薛能大拙爲詩友而
二君皆以爲不逮折行與交君卒藁多散落予爲輯
綴僅二百餘篇黃鐘玉磬咸其章章者四題曰鹿門
集析爲三卷武城鄭貽序

席本
唐詩

韓義賓

義賓深州人仕成德節度判官檢校太子左庶子御
史中丞卽忠獻王之五世祖也

唐定州別駕程君

士庸

墓誌銘

卷三十三

十三

君諱士庸字仲謙定州安喜人也系高陽而綿緒氏
列國以興家自茲以降世際明德故能高姻美爵歷
秦漢而載盛崇基累構跨魏晉而逾顯高祖結定州
刺史曾祖日華橫海軍使祖懷直歸誠王皇考權邢
國公或分土主戎威率數郡或陪武祗命康惠四方
君含璋以挺生稟和以凝氣弱不好弄早擅夙成語
嘿之機帥心則遠孝弟之至卽性載深道希四科文
膽百氏好賢之性得諸緇衣惡惡之心求之巷伯加
以神姿恢岸望之儼然雅氣貞夷聽言則厲賁秀正
園有聲邦黨固已墻幾數仞器踰萬頃者矣齒壯知

名州辟主簿治未浹辰民謠已著允可謂舉契唯良
功成共治者也義武節度尚書王公綬蒞雄藩雅君
令問下車之始辟君掌書記云今日之事猶李彊之
收君平望便降意成孤敢言爾其取重於時多類此
也遂以價重見珍轉定州別駕君乃導德齊刑威彊
恤寡千里移風四民樂業民頌政成君之力也王公
嘗從容眾中謝君而言曰海沂之康昔自王祥邦國
不空今復相賴因言是公此州管夷吾也廊廟之才
若置之周行則張茂先之流矣而道消當年運潛初
九惜哉及王公赴難京師君亦養性正華慕七子之

卷三十三

三

優游事三徑以嘉遯前言往行必得之於閨門温恭
孝友亦穆之於宗黨宜延百壽木鐸烝民而福應宜
嘿寢疾彌留春秋七十有八以中和元年十月廿二
日卒於慈仁里宅遺文後事作範當時子巖孫秀等
粵以其年十二月朔日遷窆於博野先塋惟君慎終
追遠之風緯文經武之略信可以方衡四公齊驅萬
石矣門生邢仁等悲云亡以潛目軫遺愛以茶心敬
刊泉石用昭德音敢作銘曰

同源濬起分流遠扇周王修和程侯利建自茲以降
官姻世緬於穆我君含中作彥義惟誕性孝以立身

識周先覺學廣前聞貞心潔玉秀氣貫雲龍潛或躍
獲屈載伸時惟聲恥運逾道消反躬紛靄養志蘅臯
孺心遠慕鼓腹長謡育川比量望月齊高紛綸倚伏
冥昧遭隨謂仁者壽曾不憇遺泉官一設隴路恆悲

貞徽有篆永思無虧

新安文獻志

張士賓

士賓易武軍推勾官朝散郎行太子司議郎

命大唐義武軍節都知兵馬使銀青光祿大夫檢
校工部尚書兼御史大夫持節易州諸軍事

易州刺史上柱國安定縣開國伯食邑九百

卷三十三

古

戶程公巖勳德碑頌

於戲君非臣無以化化臣非君無以贊贊惟天正明
命不絕有唐篤畀純臣以靖國難克蕩民疹將底于
成我太原王敬統舊服惠周于下下罔不格乃天祐
紀元甲戌春正月用都知兵馬使程公出復大命元
元以貞集大和也先是賊溫遵亂明毒中夏力政血
刑覆忠良殖奸宄蒸人側側不貳率乃戮王越在東
土受制字下克懷弗寧邊在王室誕宣我化靡由爾
凶惟公敷聞帝庭奉若元命帝曰休哉正侯良哉厥
使可持節易州諸軍事易州刺史封安定縣開國伯

食邑九百戶表獻臣也越茲元惡明肆虐羣大侮王
度擅煞無人薄三州威五長摺紳營營不自卽乃工
王執在厲階罔怫祇命命我亞旅咨我近藩端恤遺
人人思反德式載無欲歸于本朝朝廷嘉茂功錫不
命授公檢校工部尙書兼御史大夫詔曰懿爾巖哉
審奉天威保乂邦土是用司國樞威懾奸回政革風
俗是用總朝憲公固讓不獲祇奉天之明命維時羣
盜貌聚于野公文招徠武殄暴服如化人誕不虞廬
廬旅旅以宴以處士訓業農力穡工就務商通貨四
者各正爾下日用乃蕃踰年羣吏更告天雨淫降瀕
湧汴岸波積如阜奔灌乃雉骨恐爲魚其日固久公
聚人行水度力陳工啓元導流事若天造層城巖巖
居人坦坦庶德合于無疆歲庚午冬十一月溫益淫
凶自汴襲趙殍軼殫寶度劉暴骨公乃贊王輯睦爾
鄰推功于晉凡事得請命焉由是屯于高邑廕于栢
鄉執忠奮威罔敢加害振旅還定王用嘉享時夏大
旱滌滌甫田百穀如焚人曰祈土龍公曰非早備乃
貶躬之食勤人之瘼靡神不寅崇朝而雨秋河朔大
饑易有年也壬申春二月賊臣守光戎性貪饒厚厲
其人與溫濟惡爰以其黨伺間來寇放兵流毒延于

齊民民用齋咨涕洟籲公公曰不戢乃暴負乃人爰
請于王合從晉趙會王師于易水之上恭行伐也獨
夫惴惴天用勦焉乃破祁闕下涿鹿二豎偕遁執其
大醜馘于軍門敦奉王誅保和人極甲戌之春燕寇
抵平疆場安靖或曰厚賦人公盡人篤焉對政不賦
乃譽善抑惡發滯刊佚歲惠昭利六教旣備孳孳等
心於是奏記于王王獎之文訪于趙趙崇之請諧六
州允奉于晉賊不我制公用哆然由是匹夫匹婦蕩
伏草莽越踐公境宣服公威惕惕瞿瞿攝進成序若
公在首上集下望申命用良易人熙熙嗜化益休是

卷三十三

六

歲冬惟晉承制錫命我王用胙白茅副以金鉞昭崇
武功允正師長進公銀青光祿大夫上柱國陪武主
戎總經外政參酌彝典敬楊王休緊公德載于人人
以蕃殖翼贊方伯翦除大凶聖咨乃賢神被乃祿其
惟有終吉哉易中耆老師錫言曰奸臣反常迭寇東
土人用慘黷殆無指告維公牧我有邦天眷爾下爾
有君臣公正爾有父子公保爾有災厲公奠爾有稼
穡公成維公疇依易大圯也賡曰昭茂德崇豐碑阜
成于文庶永于世克建藥石易揚頌聲頌曰

維君配天維臣配君嶠嶠我公爲君虎臣翼襄霸府

倉有世勳大盜囂荒我東鄙孔墳不夷元元靡恃
易人恃公乃有父子泔水湯湯我泮載懲嘆魃炎炎
我年載登我用有孚爾無不承維公之德浹于爾衆
維公之勳朝野攸重貞石峩峩永以垂頌

新安文獻志

盧知猷

知猷字子謩簡能子第進士登宏辭文詞瞻麗科蕭鄴
鎮荆南劍南辟掌書記後官至戶部尚書太子太師
昭宗爲劉季述所幽感憤卒贈太尉

盧鴻草堂圖後跋

相國鄒平段公家藏圖書並用所歷方鎮印記咸通

卷三十三

七

初余爲荊州從事與柯古同在蘭陵公幕下閱此軸
今所歷歲祀條逾二紀薦雅多難編軸尙存物在時
遷所宜興歎丁未年駕在岐山涿郡子謩記

己酉歲重九日專謁大儀遂載覽閱累經多難頓釋

愁襟子謩再題

避暑錄話

張濬

濬字禹川本河間人屏居金鳳山後相僖宗昭宗時
貶官復以左僕射致仕爲朱全忠所害

太廟宮懸依古禮用二十架奏

臣伏準舊制太廟含元殿並設宮懸三十六架太清

宮南北郊社稷及諸殿庭並二十架今修奉樂懸太廟合造三十六架臣今參議請依古禮用二十架伏自兵興已來雅樂淪缺將爲修奉事實重難變通宜務於酌中損益當循於寧儉臣聞諸舊史昔武王定天下至周公相成王始暇制樂魏初無樂器及伶人後稍得登歌會舉之樂明帝大明末詔增益之咸和中鳩集遺逸尙未有金石之音至孝武太元中四廟金石始備郊祀猶不舉樂宋文帝元嘉九年初調金石二十四年南郊始設登歌廟舞猶闕孝武建元中有司奏郊廟宜設備樂始爲詳定故後魏孝文太和

卷三十三

六

初司樂上書陳樂章有闕請集羣官議定廣修器數正立名品詔雖行之仍有殘缺隋文踐阼太常議正雅樂九年之後唯奏黃鐘一宮郊廟止用一調據禮文每

一代之樂二調並奏六代之樂凡十二調其餘聲律皆不復通高祖受隋

禪軍國多務未遑改創樂府尙用隋氏舊文武德九

年命太常考正雅樂貞觀二年考舉上奏蓋其事大故歷代不能速成今時近郊天式脩雅樂制度之間亦宜搏節伏準儀禮宮懸之制陳罇鐘十二架當十

二辰之位甲丙庚壬各設編鐘一架乙丁辛癸各設

編磬一架合爲二十架樹建鼓於四隅當乾坤艮巽

之位以象二十四氣宗廟殿庭皆用此制無聞異同
漢魏晉宋齊六朝並用二十架隋氏平陳檢梁故事
乃設三十六架國初因之不改高宗皇帝初成蓬萊
宮充庭七十二架尋乃省之則奠虞架數太多本近
於侈止於二十架正協禮經

唐會要
三十三

胡密

密乾甯中靜南軍軍事判官前守靜南縣令

唐韋君靖碑

象緯降靈河嶽孕粹必能挺生人傑卓立功名爲當
世之元動作

缺三字

巨屏苟非鑒識洞達機變立微孰

卷三十三

九

能規製奇功抑揚大節不有紀述

缺

來我太守司空

京兆公陶唐氏之遠裔漢丞相之後昆簪組相

缺

別

國史詳備家譜具存布在簡書略不覲縷公少蘊大

志長負

缺

刻鶴之工微恥雕虫之伎薄相時而動臨

事不疑懷

缺

精誠蔚凌雲之氣宇語仁智卽樗里罷

說較威猛則烏獲休扛嚮

缺三字

若子牟之戀主從軍

立績同馬援之征蠻滅竈得孫臏之謀投筓祕

缺二字

之策揮劔卽蛟螭潛伏彎弓而猿狖啼號加以月角

衝衡犀文貫頂視

缺

□□堂堂罕正覲神彩剋剋無

雙寶命世之宏材爲一時之英俊者也

缺

以乾符之

際天下騷然蝗旱相仍兵戈四起公覩茲遐僻人不聊生遂合缺義口招安戶口抑強撫弱務織勸農足

食足兵以煞去煞洎黃巢侵陷京闕缺駕出幸成都

四海波騰三川鼎沸韓秀昇勃亂黔峽侵軼巴渝公

乃統缺義軍討除逆黨值秀昇盡拋舟楫圍逼郡城

公乃詳度機宜上下攔截依缺三背水布兵兩面夾

攻齊心剪撲賊勢大敗我武益揚渝牧田公備錄奏

缺節檢校御史大夫除拜普州刺史適值川師效逆

將臣專征缺合州絕其枝蔓恩旨加右散騎常侍除

拜合州刺史洎鄭君缺失律廣漢山行章尚書攻圍

當川故府主太尉丞相顧公累降命缺起應公統領

精銳二萬餘人虔告著龜申令士卒併破二十七寨

煞口萬餘人大振威聲上聞缺檢校工部尚書當州

刺史充昌普渝合四州都指揮靜南軍使累加刑缺

書右僕射公以臨郡歲久迺思退居上表陳情缺四

詔旨褒獎特許量留加金紫光祿大夫檢校左僕射

扶風縣開國缺食邑三百戶公累銜缺四魚符政茂

穎川化光河內邑有倉箱之詠俗多襦袴之謠求瘼

之缺四害之心尤切其於駕馭英傑取舍權豪重仁

義如丘山輕金帛如泥缺四老濟弱扶危逆旅如歸

遠湊鄭莊之驛遊人若市悉登漢相之門其缺四乃

如此也每遇良辰美景月夕花朝張絃管以追歡啓

盤筵而召侶缺四揖讓無譁罇酒不空座客常滿王

衍之水壺轉瑩嵒康之玉岫窳頽缺四恭又如此也

至若立功立事爲國爲家或坐運玄符或親提黑槩

缺五兇徒謀必十全舉無遺策其剛毅果敢又如此

也當其賞功罰缺五甄獎公勤黜弃私黨三軍感德

萬眾歸心其恩威刑賞又如缺三以海濤未息雲陣

猶橫常厚駟脅左綿戴實奔衝遂府使牒呼缺三然

則士馬雖精其如城柵未固思大易習坎之義徵王

卷三十三

公設險之缺年壬子歲春正月卜築當鎮西北維龍

崖山建永昌寨茲山也缺四郊原矗似長雲峯如斷

岸崖巘重疊瞻道崎嶇一夫荷戈萬人缺二芟薙草

木相度地形人力子來畚鍤雲至連薈比屋万户千

門高缺溝洫煙籠粉堞霞捧朱樓龍吟笳角之聲雷

動鼓鼙之響而又良缺民設規築城墻二千餘間建

敵樓一百餘所遐瞻天際豈龜形之缺七能擬其上

卽飛泉迸出淥沼滂流崢嶸一十二峰周缺八豈金

湯之比倫況乎糧貯十年兵屯數萬遐邇臻缺九不

闕可謂一勞永逸有備無虞公又於寨內西缺六翠

壁鑿出金仙現于手眼之威神具八十種之相好施

字迴祿俸以建浮圖聆鐘磬于朝昏喧讚唄於遠

近所謂歸依妙缺者焉其軍中節級將校等深達機

畧博識古今皆是公同志弟缺一心報國勳力從軍

咸奉渥恩皆霑爵賞或官崇題劔缺城或榮授金貂

或職兼霜憲雅苻際會允屬休明請列署名銜庶缺

密叨依門館累戴恩光學淺文荒紀缺盡神愚智拙

錄缺美事而猶疏輒將鄙俚之詞聊述缺將欲煥乎

不朽傳之無窮遂葺斯文乃鐫貞石大唐乾甯二年

歲次缺二月癸未朔十九日辛丑記金石苑

卷三十二

三

張珪

珪唐末鄉貢進士

唐故處士江夏黃府君墓誌并序

府君姓黃諱公俊字子彥其先□□人也卽春申君

歇之後長沙太守之裔孫高祖諱□曾祖諱恕祖諱

法皆高尚不仕府君生而有禮體質魁□□□淳厚

以孝義爲心處謙恭爲首家傳清儉鄉里稱□□晉

代跨於江濱迄至今焉子子孫孫樂其耕釣可謂弓

裘不墜於地也何圖暫纓微恙便至沉□藥石繼來

畧無徵應以乾符五年十月十八日歿于義興縣善

拳鄉□塘里享年七十有六娶夫人袁氏淑性懿範
婉婉和柔雅合閨閫美哉琴瑟先於府君四年而歿
有男三人長曰約公早終次曰擲曰□□先人之風
傳先人之業遠近欽奉靡不云賢有女二人長女適
吳郡張氏其女不幸早亡愛婿張公尚存昔念□□
之□□遠及良辰次女歸于譚氏奔護喪禮罔失其
儀嗚呼□□而知命矣因夫人袁氏之□□□其吉
日□□□□□□備於今日歸泉之所宜哉以□□
□年丁亥歲十月□日窆窆枕夫人塋之北庚首禮
也□寓□鄉黨請□誌難以讓陳才雖不敏聊搆斯

卷三十三

三

文以紀其事刊于荆杞銘曰

大道冥□兮混然而成得之則壽兮□之則天全我
慈孝兮終□□□主土所□兮下土則笑先□有言
兮善□及嗣永介景福兮施乎後世

古刻
叢鈔

王延嗣

延嗣閩王審知從子不受官爵閩將亡改姓唐隱居
延平以五經教授生徒人呼唐五經宋乾德四年卒
年九十四

諫閩王王審知書

天子播遷大盜蠡起跡其所由正緣朝廷政出多門

刑賞滋濫大王親舉義兵爲國平亂軋於賊臣決策
入閩士卒將佐棄鄉井墳墓從王何所圖哉志於立
功名耳今師旅暴露日久大王尙未策勳以旌戰士
而首以爵命猥及無知之私親將士解體必矣

福建通志

卷三十三

三

唐文拾遺卷之三十四

榮祿大六三品頂戴前分巡廣東高廉道加四級臣陸心源輯
崔致遠

致遠字海夔一字孤雲本新羅人年十二入唐求學
越六載爲乾符二年賓貢登第調宣州溧水尉從事
淮南補都統巡官帶侍御史賜紫中和四年歸國官
翰林學士兵部侍郎充瑞書院學士卒諡文昌俟從
祀高麗文廟

賀改年號表

卷三十四

臣某言今月某日得進奏院狀報奉十一日宣下改
廣明元年爲中和元年者展義龜城易名鳳紀美號
旣新於厯象歡聲遍振於寰區臣某誠抃誠躍頓首
頓首臣謹案王制云天子西巡狩命典禮考時月定
日同律然則三秋啟候萬乘省方金郊興肅殺之風
玉壘應巡遊之地遂遵規於舉正爰降命於改元且
大戴禮曰中也者天下之大本和也者天下之達道
致中和天地位焉萬物育焉故漢益州刺史王襄俾
蜀詞人王褒作中和樂職宣布之詩以歌君德耆舊
傳揚況及聖朝曾編新樂舉二月恬和之節播八風
調暢之音永驗休譚實諧昌運伏惟聖神聰睿仁哲

明孝皇帝陛下纂承寶位丕闡皇猷將務格苗暫勞
避狄風始行於地上易象可徵日再耀於天中休禎
斯在是以紀年有裕懸法無虧帝業中興則遠超於
前漢後漢物情允洽則近繼於元和太和足可使蠢
植昭蘇華夷悅服掩神雀黃龍之瑞應河清海宴之
期則彼蕞爾叛徒騷然嘯聚偶縱煙塵之患卽歸原
野之誅仁迴西幸之儀便舉東封之禮臣今者旣獲
成師以出必能仗義而行跡泛戈船心馳劍閣冀陳
戎捷永賀堯年臨楚水以魂飛朝天可待望秦雲而
目極捧日爲期未獲榮列朝班稱慶行在無任抃躍
戰懼屏營之至謹奉表陳賀以聞臣某誠歡誠喜頓
首頓首謹言

賀通和南蠻表

臣某言臣得進奏院狀報入南蠻通和使劉光裕等
迴雲南通和兼進獻國信金銀器物正段香藥馬等
者天威遠振星使遄歸化外癡內黠之徒竭奉贄獻
琛之禮德旣超於萬古恩已洽於四夷臣某誠欣誠
抃頓首頓首伏以聖主卜征旣以用和爲貴遠人從
化自知犯義不祥是得事尙從權德資舍垢言皆答
響禮不違經且南蠻嘗懷異謀久稔邊患數年猾夏

獨虧控北之誠列鎮徵兵驟動征南之役則乘虛可慮怙亂難防今者鳳口銜書纔飛遠地狼心感德永順皇風有以見皇帝陛下法古爲君視人如子以藏疾匿瑕爲妙策以玩兵黷武爲良箴能昭利害之鄉不失羈縻之道遂使要服修貢實旅歸仁適當多事之秋已見太平之兆則彼驃信實狗封之族尙革昏迷賊巢迺蟻聚之羣何難撲滅伧聆大捷永賀中興必可駢堯舜而殿禹湯苑五岳而池四海盛矣美矣念茲在茲臣頃者禦寇交州董戎蜀郡先則展馬援討除之勢後乃設隨何說論之機仰托皇威粗申將略喜當今日免負初心限守藩條不獲稱慶行在無任賀聖戀恩欣躍屏營之至謹奉表陳賀以聞臣某誠抃誠躍頓首頓首謹言

賀建王除魏博表

臣某言臣得進奏院狀報二月二十二日恩除建王可開府儀同三司兼太保充魏博節度使者維城茂德列土殊勞逮分閩外之憂實表寰中之慶臣某誠歡誠喜頓首頓首臣聞周歌麟趾漢譬犬牙固須地處親賢方得天垂寵寄伏以建王修善爲樂居高不危好書而旣擅多才獻表而肯慙求試今以鄴稱上

鎮魏有大名將資磐石之宗遂錫分圭之寵豈獨漳
濱之俗遠荷恩威永令海內之人皆歌德業臣限守
藩鎮不獲稱慶行在無任踴躍屏營之至謹奉表陳
賀以聞臣某誠欣誠躍頓首頓首謹言

賀封公主表

臣某言臣得進奏院狀報奉去年十月十四日勅旨
皇帝第十一妹封遂甯公主長女封唐興公主次女
封永平公主待收復京闕備禮冊命者芳舒玉葉寵
襲金根鬱佳氣於高天振歡聲於率土臣某誠欣誠
抃頓首頓首伏以遂甯公主德資元吉考祥於歸妹

卷三十四

四

之占唐興公主永平公主譽洽肅雍稟慶於降嬪之
典伴嫦娥於獨月分婺女於雙星秀發青春光浮碧
落伏惟皇帝陛下齊家理國恭已敬親流鳳展之殊
恩舉鸞闈之美命猶以暫勞仙蹕未復皇都留具禮
於宮闈待成功於干羽捧日而榮滋九族欽風而喜
播四方臣限守藩條不獲陪位稱慶行在無任抃蹈
聳踴之至謹奉表陳賀以聞臣某誠喜誠躍頓首頓

首謹言

賀殺黃巢徒伴表

臣某言臣得進奏院狀報北路軍前定難軍節度使

拓跋思恭保大軍節度使東方逵等奏宣君縣南殺
戮逆賊黃巢徒伴二萬餘人生擒三千人并賊將者
又鳳翔節度使李昌言奏探知京中賊徒潰散六月
十三日皇帝御宣政殿排仗受宰臣及百僚賀禮畢
者睿謀遠叶戎捷邁陳開雉扇而儼皇威舉鸞旌而
恭列辟天浮喜氣地匝歡聲臣某誠喜誠抃頓首頓
首伏以逆賊黃巢嘯聚兇狂偷生晷刻養姦而惟日
不足恃暴而謂天可欺敢驅螻蟻之羣累拒熊羆之
眾孽唯自作罪欲何逃拓跋思恭東方逵等身居重
位手握雄師氣吞蠹彼之徒志解赫斯之怒齊駢於

卷三十四

五

六步七步果剗於左之右之戰于野而騰威戎難伏
莽拘諸原而騁勇勢若焚枯不唯剝面春喉乃得連
頭係頸况李昌言鎮於岐下伺彼京中識虞潭鷹集
之祥辯師曠鳥聲之樂遂飛吉語遠達宸聰伫看大
戮之期克踐中興之運伏惟聖神聰睿仁哲明孝皇
帝陛下財成三極敦敘九疇出震位而臨人方瞻堯
日幸坤維而罪己更闡舜風暫勞遵養之師遙委仁
賢之將旣誅逆黨爰列賀班濯錦江邊已睹霞舒綵
仗蒼龍闕下卽聆雷振鑿音永清四海之波遍灑九
天之澤臣謬操鈇鉞尙點鼓鼙未唱凱歌唯知拊舞

顧彭野之久妨道路怒髮雖衝望秦原而將滅煙塵
愁眉已展臣限拘守鎮不獲稱慶行在無任欣抃
踴屏營之至謹奉表陳賀以聞臣某誠歡誠躍頓首
頓首謹言

賀處斬草賊阡能表

臣某言得進奏院狀報西川都將高仁厚部領兵馬
收捉草賊阡能已於十月十八日並處置訖二十一日
聖駕出羅城北樓宣慰迴戈將士各賜優賞放歸
本營者遠耀日旗高張天網梟帥已歸於大戮鴻圖
永耀於中興臣某誠歡誠抃頓首頓首臣伏以草賊

卷三十四

六

阡能跡陷迷津心辜聖澤短狐稔射人之毒瘕狗喧
吠主之聲高仁厚逐惡志雄擒奸氣勇仰資睿略靜
剗寇徒伏惟皇帝陛下有罪必誅無思不服歌採薇
而遣卒念破竹之成功親降如綸之言遍安被練之
卒妖氛息而懸山益翠喜氣浮而錦水先春自此遠
振軍聲深摧寇黨覆頑巢而在卽迴法駕以何遙臣
方事專征先聆吉語限拘藩鎮不獲稱慶行在無任
踴躍屏營之至謹奉表陳賀以聞臣某誠歡誠喜頓
首頓首謹言

賀收復京闕表

臣某言臣得河中節度使王重榮牒報四月十日當道與雁門節度使李克用及都監楊復光下諸都馬軍齊入京城與賊交戰約殺卻賊步軍一萬餘人其馬軍賊便走出城往東南路去其賊軍家口錢帛並皆遺下黃巢亦未知存亡其逃遁賊徒尋差兵馬追奔並已收復京闕訖者天威耀武月捷傳聲望宸階而初奏凱歌舉區宇而咸增抃舞臣某誠喜誠躍頓首頓首臣竊窺曩代旁探前經靜理邦家必須以殺止殺保安社稷固在雖休勿休是故不得已而用兵無所私而煦物伏惟皇帝陛下纂臨寶位丕闡宏圖匝四溟而不見揚波安九野而皆能偃草而乃逆賊黃巢暗遵邪徑深入禍門久騰吠噪之聲敢恣穿窬之便穢黷宮闕淹延歲時偷安暫戲於鼎中戮暴難逃於机上今者風行膚略雨集王師楊復光任在信臣李克用名爲勇將各思報効競奮驍雄齊心而覆滅梟巢戮力而尅收鳳里賊巢拒輪不暇亂轍潛奔于戈則電散風飛金帛則填街塞巷更展追遊之勢必擒稔惡之徒自此日月重光煙塵永息唯望宸遊之返駕伫觀盛禮於登封臣職忝董戎功慙徇難雖手無重柄數年虧奮擊之能而耳得嘉聲遠地倍歡

呼之切臣限拘藩鎮不獲稱賀行在無任手舞足蹈
慶抃屏營之至謹奉表陳賀以聞臣某誠喜誠躍頓
首頓首謹言

賀殺黃巢表

臣某言臣得武甯節度使時溥狀報逆賊黃巢尙讓
分隊並在東北界於六月十五日行營都將李師悅
陳景瑜等於萊蕪縣北大滅羣寇至十七日遂被賊
將僞僕射林言梟斬黃巢首級并將徒伴降部下都
將李惟政田球等訖其黃巢函首已送行在者聖日
重耀狂氛暗銷戎捷超於古今歡聲振於夷夏臣某

卷三十四

八

誠抃誠躍頓首頓首臣伏以歲有四時則秋行肅殺
之令武有七德則兵貴禁戢之能是故歲以無相奪
而克成兵所不得已而方用自革結繩之政皆勞祝
網之仁賊巢食土懷頑含沙稔毒深犯天紀廣□地
災九州則半致侵凌三輔則久經穢黷擢髮而旣難
數罪春喉而只待懲姦今者窮寇迴心元兇授首殺
傷老少歸附居多有征無戰之言實符王道以靜待
勞之勢深叶軍機伏惟皇帝陛下運啟中興功資下
武睹天鑒而實爲大警聽風謠而非止少康永當銷
干戈之鋒便可鑄耒耜之器况迺西山八國數年飽

巡幸之恩東岳百神終日渴登封之禮佇迎雲馭俯
納巖音臣密邇寇戎撫安疆境不暇爭鋒而進實防
代俎之譏慙虧犬馬之勞喜睹鯨鯢之戮手舞足蹈
魂飛膽揚臣限守藩條不獲奔走稱賀行在無任慶
抃兢越之至謹奉表陳賀以聞臣某誠歡誠喜頓首
頓首謹言

賀降德音表

臣某言臣得進奏院狀報司天臺奏六月十六日夜
太陰虧伏奉六月二十三日德音應三川管内見禁
囚徒等宜委所在長吏五日內疎理決遣其京畿四

卷三十四

九

面暴露骸骨宜委諸鎮切准前後勅旨差人收拾埋
瘞者望舒匿影曲赦流恩化洽泣辜義資掩骼振歡
聲於蜀壘蕩妖氛於秦川臣某誠抃誠躍頓首頓首
臣伏以日能順晷而照臨不失其所月以順時而盈
缺則維其常況當萱葉初凋桂輪自減兵銷下土非
石麟暗闕於東陵謫見上天致玉兔暫虧於西汜既
同君子之過乃軫聖人之憂伏惟聖神聰睿仁哲明
孝皇帝陛下光闡睿圖保甯區宇仁能及遠德以勝
妖爰當展義之辰克舉眚災之典慈傷痍死牢囚免
滯於風霜義貫幽魂道殫皆沾於雨露可使涪水耀

千年之色巴山呼萬歲之聲道能繼於垂衣法無妨於委轡佇迴巡幸仰賀登封臣限守戎藩不獲稱賀行在無任抃躍屏營之至謹奉表陳賀以聞臣某誠歡誠喜頓首頓首謹言

賀迴駕日不許進歌樂表

臣某言臣得進奏院狀報伏審勅旨迴駕日應沿路州縣切不得輒進歌樂及屠殺者聲除飾喜味減薦珍遠導罪已之言深播好生之德凡於蠢動孰不歡呼臣某誠抃誠躍頓首頓首伏惟皇帝陛下日月運行雷雨作解體堯舜之理能成若法禹湯之興必勃

卷三十四

十

焉退庭舞而撤宮懸惡衣服而菲飲食一慈二儉守玄祖之格言沐雨櫛風稟太宗之丕訓今則冕旒東顧挂杼西移師乙收心無以逞鏗錡之曲庖丁斂手何由挫殼鯨之形義感六牲恩加萬姓則乃蜀山力士旣無煩役之虞漢水老人豈有深譏之事帝業永資於下武物情皆慶於中興臣方擁戎旃阻隨仙蹕遙思盛禮空馳拱北之誠願報深恩但勵鎮南之志無任抃躍屏營之至謹奉表陳賀以聞臣某誠歡誠喜頓首頓首謹言

謝加太尉表

臣某言今月某日宣慰使供奉官嚴遵美至奉宣聖旨慰諭臣及將校等并賜臣勅書手詔各一封加臣檢校太尉依前充淮南節度使兼東面都統者仰窺鳳詔謂對龍顏寵榮極而何力負山戰灼深而自容無地臣某誠抃誠感頓首頓首臣伏以大司馬之威權百官所仰上將軍之法令十道皆遵豈唯整戢五兵實在諧和七政況當今日宜屬全材如臣者德乏潤身智虧周物於儒則筆慙五色在武則劍敵一夫但以荷寵天庭分憂水國擁旄重寄榮冠絕於一時仗鉞專征冀折衝於萬里幸逢聖鑒得盡忠誠今者

卷三十四

七

已率雄師將誅巨猾征旗指路遠趨堯日之光戰艦凌波方託舜風之力豈期王人遠降帝命俄臨獎其外鎮之微勞授以土司之劇任未著緇衣之美旋叨錦被之榮況乃兼制利權廣潤軍食瑞節不移於南究兵符亦縮於東陲將何異能勝此寵寄謹當冰爲夕飯藥作朝飧褰帷則面撫烝黎建旆則身先士卒羣寇旣蝟毛而起偶恣倂張諸侯必馬首是瞻共成翦滅唯力斯視何心自安必也臨亂忘身見危致命仰解焦勞之念粗申式遏之功臣旣當下瀨屯師佇欲中流設誓枕雕戈而輟寐跡寄轅門瞻帝座以馳

誠魂飛輦路未獲稱謝行在無任感恩戀聖榮抃戰懼之至謹因宣慰使嚴遵美迺附表陳謝以聞臣某誠感誠懼頓首頓首謹言

謝示南蠻通和事宜表

臣某言二月二十六日宣慰使供奉官李從孟至伏奉勅旨入鶴拓使胄嗣王龜年閤門使劉光裕等迺得驃信表并國信兼布燮揚奇肱與西川節度使書皆備述情誠無不順命其表及書白并答信物數並令錄往此事首末自卿良謀者遠降王言深窺使節跪閱上天之旨坐知外域之心寵飾踰涯憂惶若厲

卷三十四

七

臣某誠抃誠躍頓首頓首臣才非間代智不濟時但以每鎮窮邊粗安荒服免使飽飛飢附欲令前倨後恭頃者忝守成都冀申遠略遂憑釋子善諭蒙王仰稟天威得揚風教永戢干戈之患俾陳玉帛之儀雖羣議沸騰竟銜鑠金之口而宸衷剴斷早推匪石之心是以暫事西巡或虞南叛爰遣維城貴胄直闕近臣迺聖德以降尊遠傳立化譯訛言而獻欵備寫眞誠既令抱義戴仁果見奉琛執贄此皆陛下威德臣何力之有焉而迺謂臣有先見之能知未來之事設和蠻之良策備幸蜀之嚴城俯錄勤勞迺垂稱獎睹

雕題之章奏書軌既同息猾夏之猜嫌梯航相接驗南睽之贖咎知北極之紓憂雖云五利有餘敢希茂賞唯願四方無事永贊昌期臣限守藩條不獲稱謝行在無任欣躍感戴兢惕之至謹因供奉官李從孟迴附表陳謝以聞臣某誠惶誠恐頓首頓首謹言

謝立西川築城碑表

臣某言伏奉十一月六日勅旨以臣在任西川節度使日創築羅城昨因有勅嘉獎方進所賜碑詞今已付所司鐫寫建立者一片石文龜初戴立九重天語鳳已銜來雕銘莫繼於色絲寵飾遠超於華袞仰窺

卷三十四

三

恩獎俯抱憂惶臣某誠感誠懼頓首頓首頃者幸夢三刀久臨益部遙提一劔得挫蒙兵但以其玉壘可稱金城未設山口則空吞蠻蜚水頭則斜枕健羊含溪抱谷之形雖云天險比屋連甍之勢實類野居臣是以運度籌謀斟量板築蓋從人欲果致子來遂得役興而草偃川中誠感而土生石上長圍於三十六里高鎮於百千萬年不愧鐵名可將錐試隼墉烏堞儼若鸞飛錦浪緜峯迥然裝飾遂蒙陛下辱褒稱之重許刊勒之榮以爲事實可觀足得詞華不朽臣雖遇泥封激賞豈將油素矜誇非敢彰謙所期避謗今

者伏遇皇帝陛下遠巡勝槩親覽微功徵舊賜之碑
詞命新鐫之筆跡永使卓立琴臺之境平欺劔閣之
銘且杜元凱之峴亭無非自衍阮德規之齊國蓋是
眾成謾傳身後之虛名豈睹目前之盛事曷若彩毫
見獎翠珍斯刊因成下土之功終應上天之意得逢
今日別振孤風向非陛下錄善恩深酬勞德厚則何
以未有出師之業篆刻叨榮曾無興學之規傳揚竊
美臣限拘鎮守不獲稱謝行在無任感戴欣躍戰懼
之至謹奉表陳謝以聞臣某誠惶誠恐頓首頓首謹
言

卷三十四

十四

謝賜御製眞贊表

臣某言二月二十六日宣慰使供奉官李從孟至伏
奉勅旨已令於大慈寺御眞院寫朕眞并扈從宰臣
等眞列卿儀貌俱會此堂今先寄卿眞軸并朕親製
贊述賜卿冀表顯恩式彰異禮者銀璫降使玉簡傳
詞受宣而頂踵光輝拜賜而神魂驚越臣某誠感誠
懼頓首頓首臣志欽涓訣業鍊坵書敢憑涓滴之勞
自安寵寄願掃氛霧之患永竭忠誠遂在先朝便從
戎役南征北伐豈暇甯居東鎮西藩累叨重任遇陛
下龍飛之後委微臣隼擊之能蜀國防蠻則粗申遠

略楚宮捍寇則偶遂良機旋令移節於海門復許建
牙於淮甸是以常拘戎闔未覲宸階唯披天上之詔
書似睹日中之王字空增戀闕莫遂歸期頃者虔託
仁祠寫留麼質豈致去思於舊鎮唯慙取笑於空門
伏遇陛下展義陳詩停鑾駐蹕遂徵繪事俾寫聖容
其於侍從之臣宜居左右豈料孱微之質得潤丹青
愧無鸞頰之姿永侍龍顏之側況蒙宸襟顧囑御筆
贊揚高題而素壁爭輝卓立而浮埃不染然後遠飛
寵詔特遣貴臣仁捧綵牋驟竊游揚之譽初開寶軸
深驚刻畫之恩窺看而形影自慙感激而肺腸何極

卷三十四

五

昔漢朝中興聖帝下念功臣列形像於禁宮載勳名
於史筆雖令贊述不自稱揚豈如陛下暫事巡遊迥
垂獎飾別降絲綸之命親編錦繡之詞俾臣位掛於
鳳凰池中名超於麒麟閣上遐尋故實獨荷殊榮有
何出眾之能見此非常之寵所謂千年嘉遇萬代美
譚唯當志勵風霜永驗松筠之不改身霑雨露免憂
蒲柳之先衰臣限守藩條不獲稱謝行在無任感恩
戀聖榮躍兢懼之至謹因供奉官李從孟迴附表陳
謝以聞臣某誠惶誠恐頓首頓首謹言

臣某言二月二十六日宣慰使李從孟至伏蒙聖恩
別賜臣御札衣襟并御服衫一領龍腦香一金合金
銀花散梳一口金花銀盃一隻者口窺神筆恩襲御
衣仙香氣撲於鼻根寶器光騰於眼界仰霑寵錫俯
積憂兢臣某誠感誠懼頓首頓首臣每念業紹弓裘
任叨斧鉞誓傾忠節終報聖朝去年親率驍雄願殲
克醜旋承綸音已駐舟師旣慙叩機之言徒切枕戈
之望豈期貂冠傳命龍袞裁書辱宣尼一字之褒過
光武十行之詔加以粉分御筭香滿雕奩花鐫乃麗
水之珍雪口透任山之器捧玩而實驚竅吏緘藏而
永耀子孫雖有幸逢時輝榮驟集而無功受賞愧恥
難居徒荷鴻私何申豹略身依楚水未陳告捷之書
目斷蜀天但灑感恩之淚臣限守藩鎮不獲稱謝行
在無任荷戴激切榮抃兢懼之至謹因供奉官李從
孟迺附表陳謝以聞臣某誠惶誠恐頓首頓首謹言

謝加侍中表

臣某言臣伏奉去年十一月十一日恩制加授臣侍
中依前淮南節度使階勳封並如故仍加食實封一
百戶者有命自天處身無地感深以泣寵極而驚臣
誠抃誠懼頓首頓首伏以黜陟分科聖君至教行藏

守道達士良規慮受爵以斯亡在持盈而不殆臣自
提權筦便遇兵戈郡邑爲征戰之場山海足逋逃之
藪旣難聚利莫遂成功況乃權有他門刃無餘地動
見越庖代俎無非避柱觸楹遂虧漕輓之程僅壞銅
鹽之法伏蒙皇帝陛下俯詳直道不宣嚴誅選用良
才改移重務而乃察臣在公之節念臣戀主之誠重
委將壇更增封邑恕乏一時之秀許攀七葉之榮唯
慮慙卿或譏竊位然臣今所以自賀者三朝獨立七
鍾榮遷每當拜爵王庭不省謝恩私室以茲勵已永
免愧人謹當激發壯圖殲夷窮寇粗息四方之患仰
寬萬乘之憂臣限守藩條不獲稱謝行在感恩戰灼
屏營之至謹奉表陳謝以聞臣某誠慙誠懼頓首頓
首謹言

謝加侍中兼實封表

臣某言六月十六日供奉官劉叔齊至奉宣聖旨慰
諭臣及將校并賜臣勅書手詔各一封官告一通就
加臣侍中仍加食實封一百戶餘如故者自天降命
無地安身啟鳳詔而魂驚對貂冠而股慄臣某誠感
誠懼頓首頓首臣早因薄效每忝殊榮勤王而素乏
實勤受爵而但多虛受負山寡力臨谷戒心況自戎

馬生郊陣蛇出穴妖氛蔽闕法駕省方臣久鎮雄藩
嘗提重柄一無成績兩拜寵章前者以上將軍爲大
司馬今則兼納言之任加眞食之榮累年虧橫草之
功終日抱伐檀之恥且易曰或錫鞶帶終朝三褫之
詩云受爵不讓至於已斯亡遍覽格言是懲貪祿不
能報國苟欲榮家臣實何心有覩于目但遇王人遠
降聖澤俛流仰賻綸音深嘉稅政以爲師徒輯睦黎
庶安甯俯念忠誠特行懋賞臣也方寸之地可倚咫
尺之顏不違豈敢矯俗陳情飾詞讓爵難效一辭而
退唯期三命益恭旣除勞力於利權終願勵心於閭
寄臣伏限守藩不獲奔赴行在稱謝無任感恩戀聖
戰汗屏營之至謹附供奉官劉叔齊奉表陳謝以聞
臣某誠惶誠戀頓首頓首謹言

請巡幸江淮表

臣某言伏以舜伐有苗修德而終能率服湯征自葛
行恩而競望來蘇斯皆今古之美譚實乃帝王之盛
事固敢踰天負責向日裁誠仰陳利害之端冀副華
夷之望不量狂瞽遠黷聖聰臣某誠惶誠懼頓首頓
首臣聞日月以運行爲德承麗于天江河以委輸是
期必朝于海上能昭其煦育下方遂於通流況乃天

灾非人力能除地分有兵戎不起將獻永安之兆軌
陳可復之詞伏自寇陷上京兵徵外鎮猛銳始從於
鶴列旋致徒歸頑克尙固於蟻封難成盡瘞臣豈唯
投袂實至衝冠昨率舟師暫屯江次必欲朝離楚岸
暮及漢濱旗張商嶺之風劔拂秦川之霧願言薄伐
冀效微勞尋蒙陛下遠許分憂不令離任臣進退惟
命始終無虧甯招曠職之譏敢涉爭功之責又緣淮
海乍息烟塵忽若去兵必當致寇則迺江南沃壤盡
成蠶食之資淮北強鄰暗展鯨吞之勢輿賦旣無所
倚軍須將必屢空是以仰奉勅書已班師旅四境之

卷三十四

九

赤眉歸伏八州之黔首謐甯遍布皇恩粗申將略然
而關中縱敵閭外偷安旣乖踴躍以身先每切慙愧
於顏厚伏惟皇帝陛下省方展義駐蹕經時疆域壯
麗之形金湯雖固鳳輦巡遊之費桂玉可虞况舊謂
西川富強祇因北路商旅託其茶利贍彼軍儲今則
諸道發表章則半載始迴徵貢獻則經年未達實緣
道路遼夔兼值干戈阻躡值剽掠者斯多至行朝者
甚少加以僦雇所費耗蠹不輕每當水運陸般只可
率鍾致石以此征稅則漸成抗弊軍兵則未遂飫饒
伏慮扈從實繁宴犒仍廣盡搜資於三蜀難濟用於

百司苟興旰食之憂實憐庶寮之望又以蜀川僻居
邛棘□人密邇蠻戎虺毒潛吹獸心難測儻或乘虛
犯境率眾渡瀘六軍之熊豹騰威縱能制敵八詔之
豺狼作暴不免喧驚事可酌於將來禍須防於未兆
伏惟陛下覽臣忠懇察臣直言暫迴西幸之儀更舉
南巡之禮使處處息後予之怨人人安戀主之心天
下幸甚天下幸甚且如遠狩河陽僞遊雲夢將興霸
王俯順權宜況江淮爲富庶之鄉吳楚乃繁華之地
陛下九年理國四海爲家豈比周之東遷非擬晉之
南渡賊巢克狂久聚穢黷難除縱便收城未宜迴駕
豈如楊都粵壤桂苑名區四夷之賓易朝天九牧之
貢無虛月伏乞陛下俯迴鳳宸略泛龍舟必想山靈
卷三峽之風水伯寢九江之浪迴尋禹跡允叶堯巡
昔也日耀錦川天不傾於西北今則風行澤國地無
缺於東南然後發使清宮舉章司隸振盛儀於歸闕
告休績於登封臣雖識昧變通而志勤匡濟敢憑草
奏輒貢管窺無任戀聖感恩戰越屏營之至謹奉表
陳請以聞臣某誠惶誠懼頓首頓首謹言

第二表

臣某言聞聖人能以天下爲一家以中國爲一人者

必聞於其義達於其患然後能爲之臣遂自前年繼
陳短識請移車駕巡幸江淮計資於避險就安事叶
於暫勞永樂未迴聖鑒再獻瞽言臣某誠慙誠懼頓
首頓首臣尙阻擒奸敢言伐善然但願愚夫之一得
難追賢者之三思臣頃鎮成都偶諧遠慮克符天意
亟就土功別營雉堞之雄規永壯龜城之峻境爰憑
釋子善誘蒙王果俊倔强之愆便付懷柔之信皆資
帝力能肅物心伏遇陛下遠耀珠旗高臨玉壘樂降
絲綸之旨深嘉毫髮之勞謂臣有先見之機念臣以
至誠所感仰銜睿獎倍激忠誠然則常年已往之功
粗成籌畫今日未來之事竊有管窺苟或緘辭則爲
負德不辭鼎鑊輒貢芻蕘臣近者俯察時情仰瞻乾
象荊州道路羣寇將侵蜀國封疆微灾似起儻或未
收鳳闕尙駐蠻輿忽有妖氛潛興近境必恐烏合蠶
食之徒占據江陵把斷峽路則列鎮貢賦無計流通
行在詔書亦難傳降若見東西阻絕固當遐邇動搖
伏惟陛下斷自宸衷斥其橫議念江淮之進獻遠涉
多虞察蠻蠻之奸克乘虛可懼早移仙蹕直幸楊都
滅星辰交錯之灾叶日月運行之理則乃九州斧鉞
討戎而齊願風驅四海梯航奉贄而必能雲集盛矣

美矣念茲在茲且逆賊黃巢久躡皇居多成穢跡直
到虎收之後須勞繕葺之功更俟二三年之間可興
千萬世之業慮不先定事難速成伏乞陛下覽謁節
之言闡隨時之義俯從衷懇暫事宸遊天下幸甚天
下幸甚臣粗識古今略詳利害自非激以爲智豈敢
知而不言謹奉表陳請以聞臣某誠惶誠懼頓首頓
首謹言

卷三十四

三

首卷言

朕而不言蓋奉表陳請以聞臣某誠惶誠懼頓首頓

首幸甚臣粗識古今略詳利害自非激以爲智豈敢

知而不言蓋奉表陳請以聞臣某誠惶誠懼頓首頓

首幸甚臣粗識古今略詳利害自非激以爲智豈敢

知而不言蓋奉表陳請以聞臣某誠惶誠懼頓首頓

首幸甚臣粗識古今略詳利害自非激以爲智豈敢

知而不言蓋奉表陳請以聞臣某誠惶誠懼頓首頓

唐文拾遺卷之三十五

榮祿大夫三品頂戴前分巡廣東高廉道加四級臣陸心源輯
崔致遠

讓官請致仕表

臣某言臣伏以聖君御宇必先塞彼倖門良士省躬
唯慮妨其賢路苟遠官謗是辜主恩況臣關中無定
難之勳閫外乏分憂之效強欲晏安寵祿其如玷浼
刑章永言量力而行固在奉身以退旣知無隱寧避
有辭臣某誠慙誠懼頓首頓首臣少勵琢磨晚師擒
縱不以一經介意粗於三略留心願紹家勳免虧堂
構先皇帝念臣孤直試以諸難出分大將之威權坐
受上卿之爵秩故得內稟聿修之訓外伸式遏之能
北掃虜庭則胡雛不敢南牧南清獠海則蠻謀無由
北窺及覲形埤暫司緹騎俄屬齊郊聚孽鉅野輿師
臣也不才謬膺斯任伏遇皇帝陛下纂臨宸極警諭
戎藩舉旌鉞以分勞聽鼓鼙而軫念謂臣有戢兵之
奇略察臣立降寇之微勞遂令位假中台名編外相
夢想旣通於鳳沼威稜益峻於龍旌其後瀘水波驚
蜀山霧暗久念雕題之患遍流黔首之災又蒙命臣
曰俞爲帥於彼爰遵薄伐得解倒懸豈敢貪天之功

願銘鍾鼎祗能因地之利別建溝隍伏蒙陛下俯獎忠誠特行懋賞開國授周司徒之貴立家紹漢丞相之榮臣此時早誠持盈輒思請老必願告休錦里退隱羅浮不料壠上耕夫盡解揭竿斬木草間惡子競謀蟻聚蜂飛當荆門失守之時乃楚塞宿兵之際忝趨戎旆兼縮牢盆僂俛而未能報恩駢馳而何敢言病或狹狹磨牙於原野或鯨鯢噴毒於江湖尋提招討之權求撫句吳之俗遠憑睿略深挫羣寇泊解印海門建牙淮甸上將軍之劇任首冠列藩大司馬之雄資先沾宥禮揣頂踵而偏濡雨露扼咽喉而莫效

卷三十五

二

涓埃且自黃寇憑陵翠華巡狩仰天戮力竊嘗服王導之言終日痛心何止洒袁安之淚及至成軍已出又緣奉詔卻迴行藏雖順於綸詞進退實慙於物論遂見時溥興北林戎役周寶致南鄰責言玉每慮於俱焚金亦憂於眾鑠幸蒙陛下涵之以海量炤之以天光如見肺腸得保首領然臣也先軫以直言逞志曹植以深過責躬則二年忝都統之名不能誅奸戮暴四載主銅鹽之務不能富國贍軍是以兵權則屢見改移利柄則變爲分割凡此辱君之命莫非職臣之由臣猶自知況在陛下擢髮而旣難數罪乞骸而

唯願辭榮今者大憝奔逃上京克復氛祲卽當殄滅
寰區永見廓清臣有忝登壇無能報國行當莽齒居
亦胡顏兼以頃鎮蠻陬久棲瘴嶺蒙犯其妖烟毒霧
剗除其封豕長蛇當年而靡憚勤劬晚歲而皆成疾
疹不將筋力爲禮旣載前經苟或身心自憊難逃後
患雖思強飯實愧素餐廣陵爲楚澤上游醴府乃漢
朝大任以臣衰老當此重難必恐終無所成遂希不
可則止伏惟皇帝陛下知人爲哲多士以宵選英才
而代處是邦俾微臣而退居散地鬪於菟之逃富固
是忠貞王內史之辭官誠非矯飾幸遇舜風無外漢
日再中陛下旣已除肝食之憂微臣亦希免夜行不
息臣無任望恩戀聖懇追兢灼之至謹奉表陳請以
聞臣某誠感誠懼頓首頓首謹言

謝詔狀

右臣伏奉四月十日詔旨黃巢克逆穢黷宮城罪惡
貫盈人神共怒尋東兵合勢翦滅元兇想副朕懷已
道道路佯聞克復永耀功名者十行天語萬里星飛
捧窺而壯膽初驚跪讀而愁眉頓豁竊以黃巢禍心
斯極根力旣衰肉已太鹹果□將落蹙起烟塵之患
則歸原野之誅臣每當永夜枕戈早願中流叩楫自

啟行十乘已屯駐五旬伏緣江路多虞風波未便暫
淹行色用候良時非致役於遷延但興懷於矍鑠今
則仰覩鳳銜之詔况乘隼擊之秋俯勵軍謀仰遵睿
算卽冀朝離江北暮到漢南長駟背水之師永破滔
天之孽率奮義感恩之眾氣已凌雲殄藏奸匿暴之
徒勢如沃雪伏惟陛下歲巡備禮時邁傳歌將示罪
於三危乃宣威於七德臣遠承獎諭誓盡勤勞身暫
寄於戈船心每馳於劔閣唯願西都獻捷早申收復
之微功東嶽告成得覩登封之盛事臣無任感激兢
懼之至謹奉狀陳謝以聞謹奏

卷三十五

四

謝詔示權令鄭相充都統狀

右臣伏奉去年九月九日詔旨卿曾間道獻章諸鎮
飛檄便欲長駟甲馬親議專征未卽便來須權制置
遂命鄭畋等分爲京城四面都指揮諸道師徒慮卿
偶未委知故茲詔示者伏以書曰無偏無黨王化乃
興詩云不識不知帝謀是稟况兵當伐叛事合從權
臣去年先因淮北侵疆後值江南阻路久屯師旅未
遂戰征陛下妙選羣才近分重寄鄭畋等莫不身先
貔武手運豹韜旣當怒髮爭衝固謂賊育可堪仰酬
睿獎竟勵忠誠臣也遠鎮臨戎強隣結憾唯慙曠職

豈望成功伏蒙陛下尙念勤勞曲垂慰諭觀上天之
慈意解外地之憂深既許將軍獨舉柳營之令終期
叛卒必歸竹町之誅臣限守戎藩不獲稱謝行在無
任感激戰懼之至謹奉狀陳謝以聞謹奏

謝宣慰狀

右宣慰使供奉官李從孟至伏奉去年九月九日勅
書手詔兼宣恩旨慰諭臣及將士等者伏以感恩效
命武士常規仗順摧克元戎素分賊巢偶乘奸便尙
道嚴誅臣願膾彼逆鱗鸞其邪膽掃重氛於魏闕迎
法駕於蜀都是以去年據馬援之鞍敢矜獨勇杖辛

卷三十五

五

毗之餞親率諸軍久在江干再承天旨不令離任遂
已班師豈料伏蒙陛下念及老臣撫茲眾卒特迺星
使遠降泥封綸傳萬乘之言纖微不聞續彼百夫之
體慰暖皆均歡呼而聲已振雷感泣而淚將成兩唯
期勵節共願報恩臣限守藩條不獲稱謝行在臣無
任感戴榮抃戰懼之至謹因供奉官李從孟迴奉狀
陳謝以聞謹奏

謝詔獎飾進奉狀

進奏院遞到恩賜手詔一封

右臣伏奉詔旨以臣先□供軍應接使駱潛等進奉

銀事特賜獎飾者伏以收功示賞乃聖主之異恩萬物輸誠固藩臣之常事但屬敵滋鄰境寇阻道途運綱而旣闕先登贄禮而僅侔錫貢早成□滯况涉渺微是以雖憑孱水之珍難追塗山之罪豈料鴻毛比價方申懇悃之心鳳口銜書遠降褒稱之旨感激而懷榮爲懼揣修而報德何期臣限守藩條不獲稱謝行在無任荷恩戀聖屏營之至謹奉狀陳謝以聞謹奏

謝詔示徐州事宜狀

右臣先奉詔旨據時溥奏卿本道羗兵侵境殺傷令

卷三十五

六

務止遏者臣遂具時溥誣謗事由申奏伏奉二月二十五日詔旨今則寇孽不日勦除藩方務息爭競所宜和叶各保封疆者臣伏以天德旣高側管者固難窺測日恩至廣戴盆者自阻照臨是以遠竭愚誠動違聖慮時溥旣銜睿獎得縱兵威早成熊據之謀更展鯨吞之勢累興師旅來犯封疆焚郭邑於山陽掠資財於淮上臣遂令捍禦略挫兇狂而乃時溥奸計已成根株巧言頗有枝葉不思已過敢惑宸聰今者再奉絲綸仰遵徽纆唯期寬則得眾粗可和而不同臣分闡無功戢兵爲務至於草寇猶許歸降況是鄰

藩豈謀侵擾彼無此詐此無彼虞臣限拘鎮守不獲稱謝行在無任感激屏營之至謹奉狀陳謝以聞謹奏

謝詔止行墨勅狀

右臣伏奉詔旨去春權降詔命許諸道承制除官已兩度降勅止絕自今後凡有要甄獎者並於急遞奏聞不得更議承制者臣伏以漢朝鄧禹始啟倖門魏室曹瞞敢專重柄欲敦於自家刑國所惜者唯器與名伏遇陛下遠事宸遊慮防爵賞遂降無私之澤遍資諸道之權不料人人而競弄筆端處處而皆誇墨

卷三十五

七

勅長蛇封豕猶匿暴於神州狗尾羊頭已成羣於列鎮臣前年雖奉詔旨未欲施行卻緣親率軍兵遠期征討此時久屯南浦將泛西江忽被鎮海節度使周寶欲惑軍情潛施巧計便以無功將吏悉皆超授官榮臣所領士卒旣多將校不少彼安坐者猶爲甄獎此遠行者豈免怨嗟遞口聲傳從頭憤激臣若不依周寶必恐事生遂准詔書得行軍賞已曾一一具事由申奏訖自奉前年十一月一日勅旨仰遵成命靜守常規至於近日所招賊徒只與往時先賜官告曾無僭越豈可隱藏今者外將忠誠永當無一大君善

教已至再三泣告而天何未聆憂懷而地謂可入臣
限拘藩鎮不獲稱謝行在無任戰越屏營之至謹奉
狀陳謝以聞謹奏

謝邨公甫充監軍手詔狀

伏奉某月日勅書手詔各一封

右新授當道監軍邨公甫四月十日到伏蒙聖恩賜
臣勅書手詔兼慰喻臣及將校等九天降詔萬里宣
恩柳營之列將歡呼桂苑之羣寮感泣伏以邨公甫
素懷材略久撫軍戎漢南之職業可觀江北之物情
獲賴旣見寬能得眾必令師克在和臣仰窺五色之
書俯慰三行之士喜氣高侵於畏日歡聲遠振於薰
風臣與將校等無任感恩激切榮抃屏營之至謹奉
狀陳謝以聞謹奏

謝除鍾傳充江西觀察使狀

右臣先奏請授鍾傳江西觀察使其高茂卿乞別除
廉鎮伏奉七月五日詔旨允許特賜獎飾者天從素
望風遞仙音旣諧舉善之誠實叶分憂之寄伏以鍾
傳比從屬郡來援府城撫綏而使洽眾情禦備而能
成遠略高茂卿旣多梗阻不免徊翔固難掉鞅而旋
豈許垂橐而入臣以戒之在鬪事可從權遂具奏論

輒陳利害不料一言之善遽得動天終令二將之才
皆榮列土鍾陵江徼銅柱海隅政成而必有可觀恩
重而各得其所臣限拘鎮守不獲稱謝行在無任感
激兢灼之至謹奉狀陳謝以聞謹奏

謝就加侍中兼實封狀

右臣得進奏院狀報伏奉某月日恩制加授臣侍中
餘並如故仍加食實封一百戶者九重降命萬里傳
聲側聆而踴躍忘疲內揣而怔忡失措伏以納言進
秩頒邑賞功固須德望鎮時仍有勤勞濟物然後方
可謂君無虛授臣無虛受如臣者謬提旄鉞免墜弓

卷三十五

九

裘空有志於四方竟無能於一割況自羣克蝟結戰
陣蛇奔狂鱗久戲於鼎中聖駕遠巡於劍外臣也動
不能剗烟塵之患靜不能贍山海之資遂蒙改易兵
權分張椎課雖值盤根錯節其如有斧無柯安邦之
計策何成富國之機謀莫就唯甘黜爵以警慢官豈
期陛下恩洽無偏義深宥過特超眾例許陟高資印
標石鵠之祥早慙不次冠聳金貂之飾愈覺非宜況
叨眞食之榮實愧素餐之咎但屬狼星未滅鯨浪猶
翻方期抗旆以專征不敢懸車而請老謹當訓兵是
務殄寇爲期粗申武弁之威仰報彤門之賞臣限守

藩鎮不獲稱謝行在無任感恩戀聖戰汗屏營之至
謹奉狀陳謝以聞謹奏

謝秦彥等正授刺史狀

新授和州刺史秦彥

新授滁州刺史許勛

右件官臣先奏請各授管內刺史今月某日得進奏
院狀報伏奉某月日勅旨允許者九天降寵兩地分
榮觀降將之懷恩喜元戎之獲請伏以秦彥等比者
爲梟爲獍維虺維蛇久流螫蠹之灾未有誅鋤之便
臣偶令招諭旋自歸投遂假分符皆能守節誠宜獎
勸輒具奏論今者聖澤濡枯皇風盪垢纔擲黃巾之
飾許登卓蓋之資秦彥等旣荷新恩永除舊惡必也
出榮建隼入效懸魚學其守土之規贖彼滔天之罪
臣限拘藩鎮不獲稱謝行在無任抃戴兢灼之至謹
奉狀陳謝以聞謹奏

奏請從事官狀

管田判官將仕郎殿中侍御史內供奉賜緋

魚袋宋絢

右件官相門傳慶詞苑成名退居安東郭之貧就養
奉南陔之詠自參戎幕備見良籌佐理而星霜屢遷
清勤而風雨不改久禪重任敢覘殊榮伏請轉宮改

章服依前充職

攝鹽鐵巡官朝議郎守京兆府咸陽縣尉柱
國高彥休

右前件官訓稟儒宗才兼吏術王畿結綬早見勤勞
賓席曳裾頗多婉畫望憲臺之清秩助推筦之重權
伏請轉官依前充職 以前件狀如前伏以臣子之
所以立身者以孝以忠慎終如始若遂榮親之望必
勤事主之誠且如擇隣卜居斷織勵學至于成立色
養無虧能報慈母之恩則朱紉有焉又如教以義方
退而學禮至于仕宦力行有規能遵嚴父之訓則彥

卷三十五

十一

休有焉臣是以久籍謏猷仍嘉德行事堪勵俗志切
薦賢伏惟皇帝陛下恩流域中孝理天下特迴睿獎
許假賓口冀令修已從知盡以敬親務本干黷宸展
無任兢惶謹錄奏聞伏聽勅旨

奏請僧宏鼎充管内僧正狀

僧宏鼎充管内僧正狀

右件僧跡洗四流心拘八政演法於有緣之眾致功
於無口之言伏自翠華遠省於風謠丹詔屢徵於月
捷兗渠未滅銳旅猶勤去鼎常令僧三十人晝夜轉
念功德張開覺道教化闔城所願早覆梟巢便迴鸞
駕雖不關於至理實自發於精誠兼絲當道屬郡既

多仁祠不少若無綱領難肅緇流伏乞聖慈俯詳所
請許充當道管內僧正仍賜紫衣所冀身掛金襴逞
養鷹之雋氣手持玉柄制醉象之狂徒謹錄奏聞伏
聽勅旨

謝許宏鼎充僧正狀

右件僧臣先具狀申奏請充當道管內僧正仍賜紫
衣伏奉勅旨依允者伏以宏鼎久勤轉念輒具薦論
能資十地之因遽荷九天之寵元戎獲請喜三教之
並行法侶歡呼驚一佛之戒出唯冀永持功德上報
慈悲苟不能盪火宅之餘災則何以稱水田之華服
必可潛燃慧炬助滅妖氛臣隕守藩條不獲陳謝行
在無任感戴燎灼之至謹奉狀陳謝以聞謹奏

謝除姪瓊官狀

前守京兆府鄠縣尉高瓊

右件官是臣姪男今得進奏院狀報伏蒙勅旨除授
彭州九隴縣令仍賜緋魚袋者伏以高瓊早乏藝能
忝從祿仕佐理未閑於吏道列官已陟於王畿昨者
背秦嶺而脫烟塵面蜀川而就雲日雖有心於葵藿
且無托於萍蓬豈料不由薦論便賜超擢繼拋黃綬
遽沾墨綬之榮始佩銅章又竊銀章之貴況乃隴陽

屬邑益部名區正當巡幸之邦實謂來蘇之地豈伊
殘劣能此勝當臣也必令行愼履水坐勤飲水勉追
芳於花縣無致辱於竹林臣限守戎藩不獲稱謝天
庭無任感恩戰懼之至謹奉狀陳謝以聞謹奏

謝弟祝再除縣州刺史狀

縣州刺史高祝

右件官是臣堂弟今得進奏院狀報奉某月某日恩
制除授金吾將軍被軍州官眾狀舉留續准勅旨依
前授縣州刺史者恩資鳳展喜集鵠原形影光輝精
魂震越伏以高祝早從裾履免墜箕裘既懸報主之

卷三十五

三

誠得習牧人之術昨者忝膺寵寄粗舉政條銀水金
山曾無自潤帶牛佩犢或有可觀振家聲廉慎之名
致郡俗舉留之請況乃秩假帝之喉舌官登王之爪
牙仕宦旣榮分憂又重祝也必遵勗勵更慎撫綏不
辜署劍之恩以謝擁轅之眾臣亦申教誨俾贖貪叨
俱在朝之盛儀雖慙前哲各爲郡之清譽可畏後生
其資綽綽之詩冀播優優之政臣限拘藩鎮不獲稱
謝行在無任感恩抃躍之至謹奉狀陳謝謹奏

謝姪男宏約改名濟除授揚州大都府左司馬

狀

初散大夫前行潤州上元縣令柱國高弘約
右件官是臣姪男先具奏請除授楊州司馬并請改
名濟伏奉勅旨依允者九天渥澤萬里塗程沐恩命
於堯階泛光輝於阮巷負山旣重臨谷何安臣以高
濟早列官裳頗聞吏術建業字入之政曾有微功惟
揚典午之資敢希薄授始陳丹請驟竊殊榮濟也譽
雖讓於王晞名不慙於程昱聖君如父照臨實表於
無偏猶子比兒訓勵必遵於匪懈俾申勤效少贖貪
叨臣限守藩條不獲稱謝行在無任感恩激切兢灼
之至謹奉狀陳謝以聞謹奏

卷三十五

古

奏請姪男劬轉官狀

前鄂州都團練副使朝議郎檢校祠部郎中
兼侍御史柱國賜緋魚袋高劬

右件官是臣親姪男粗詳吏術早忝官裳始佐理於
江陽旋從知於寒壤實得片言以折獄未嘗枉道而
事人遂荷寵榮已登班列尋叨命服久倅廉車方當
寇盜喧驚亦有籌謀施展加以每遵家法願報國恩
宗族稱孝悌之名僚友許溫恭之行臣是以輒思內
舉敢具上陳引以進之守戴禮之深義惟善所舉憑
舊書之美譚伏乞聖慈俯鑑忠懇特賜除授峽內刺

史劬也必能勵心從政常銘馬援之言竭力分憂不負謝安之舉于黷宸辰無任兢惶謹錄奏聞伏聽勅旨

奏薦歸順軍孫端狀

歸順軍都知兵馬使銀青光祿大夫檢校國子祭酒兼左武衛將軍御史中丞上柱國孫

端

右件官巢鳥知風園葵向日能投善教永戢姦圖既悛抗斧之心可在執殳之列仰希甄獎輒具奏論伏乞聖慈特授一官勒在軍前驅使冀率感恩之眾永

卷三十五

五

除稔惡之徒謹錄奏聞伏聽勅旨

奏李楷已下參軍縣尉等狀

以前件狀如前伏以臣當府淮海奧區州縣多事永言屬吏實籍得人每憂輿賦闕懸漸難責辦若俟銓衡注擬恐失舉賢前件官等皆爲君子儒有古人志學優則仕旣知祿在其中見善若驚不愧藝成而下可以參臣軍事可以代臣邑僚試假缺員頗彰殊效况抱斑衣之樂冀攀黃綬之榮伏乞聖慈允臣所請干冒宸鑒無任兢惶謹錄奏聞伏聽勅旨

奏楊行敏知廬州軍州事狀

右臣伏以武士所先惟忠與勇忠勇兼著行敏有之自假郡符能勤□理銳旅有爭先之志齊毗無背怨之詞蓋乃訓鍊齊戎撫綏周室在於巡屬實越輩流累具奏論請賜正授伏慮道塗艱阻未達宸聰每籍幹能再陳薦舉永言成績可使頒條伏乞聖慈特賜允許干蹟宸鑒無任兢惶謹錄奏聞伏聽勅旨

奏誘降成令瓌狀

草賊黃巢下孽隊賊將成令瓌徒伴四萬人
馬軍七千騎

右件賊徒元受黃巢指使占據潼關尋自孽隊奔逃

卷三十五

六

所在燒劫就中斬黃管內最甚傷殘臣伏以肅齊王者之師必期無戰遵奉聖君之德可恕有瑕暫緩討除先加告諭臣昨者專差押衙丁威賁委曲深入招誘果願歸降兼乞委任郡符展效忠節其成令瓌臣當時補充軍前押衙兼給功名檢校國子祭酒兼御史中丞官告一通權知楚州軍州事以今月二十三日部領手下兵士到楚州倒戈訖伏緣楚州與徐州漣水對岸今春曾被寇戎驟來攻劫雖頻討逐未盡誅擒況漣水賊徒久蓄姦謀潛行偵謀常排戰艦欺視孤城再欲奔衝終爲患害臣以此特將此郡權授

令瓌既能投信義而來必得破頑克之窟臣久臨戎
事素習軍謀以爲先則惠而後則誅兵家所貴遠者
懷而近者悅帝道方興上窺含垢之恩下察慕羶之
志不勞寸刃唯假尺書成令瓌遂革野心能從天意
叛徒四萬盡爲樂業之齊人精騎七千皆作輸忠之
烈士旣當恕罪倍見感恩蜂飛之小寇旋銷蝟結之
元兇可殄斯乃陛下祝除三網舞耀兩階信旣洽於
豚魚化能移於梟獍善師不陣敢矜止殺之權至道
無私但仰好生之德其成令瓌下願在軍門及放散
人數請續具申奏謹錄奏聞謹奏

卷三十五

十七

奏招降福建道草賊狀

福建道溪洞草賊何疇張延鄂瓌悚等徒伴
共八萬人

右件賊徒自去年冬侵劫信州界內臣以其道途阻
闕溪洞險艱若欲討除恐爲勞役遂於今年二月內
差節度衙推諸葛成充東面招諭使判官便賈委曲
職牒招誘其賊首何疇等三人雖行匪有師而卜能
從吉一時應響三窟除姦纔當言下歸投兼乞軍前
展效臣□□委曲補職名追赴軍前俾申忠節臣伏
以小人興叛所迷者貪競之心上帝垂恩所惡者殺

傷之事終能耀德固可弭兵與其繼獻捷書曷若盡
收降款是以遠飛折簡便倒羣戈塵不假於曳柴風
自行於偃草溪頭洞口免汚烟霞閩嶺鄱江豁通道
路況乃各期後效盡願前驅能令八萬餘人永不二
三其意有以見陛下皇威天覆玄德日新四郊之烟
壘將銷萬國之梯航競集則乃軍中士卒安身而永
別戰場宇內生靈攜手而齊登壽域臣無任歌詠屏
營之至其何疇等下補職名願隨臣征行及放散人
數請續具申奏謹錄奏聞謹奏

奏姪男劭華州失守請行軍令狀

卷三十五

六

具銜高劭

右臣伏以饋軍之將禮所興譏大義滅親傳曾垂訓
將肅安危之本必嚴賞罰之科竊自巨猾增驕王師
致討臣堂姪男劭比在河中司錄得受李□都指揮
領昭義之甲兵收華州之城邑稍申鷹犬之力暫挫
梟狼之聲已蒙特降殊恩俯旌微效服榮金紫位忝
星郎始離蒲坂之具寮遽假蓮峯之通守誠合率忠
勵勇醜醜摧兇稟進尺退寸之規決萬死一生之計
終申誠節仰報寵光昨者狂孽併來疲兵再戰旣絕
安西之救難申逐北之威然而不能潤草塗原永忘

苟活抑使靡旗亂轍旋見脫歸致諸道之星分縱姦徒之霧結職此之過罪無所逃豈可當二峰保守之時遽沾寵賞及一陣奔亡之後得免誅夷國有常刑軍無貸法懲一勸百念茲在茲伏乞聖恩特行嚴典狗手藩鎮警彼師徒所冀國章永能安於社稷微臣家法亦不昧於神祇干冒宸聰無任責躬泣血戰越之至謹奉狀陳請以聞謹奏

奏請天征軍任從海等衣糧狀

天征軍都將任從海及節級軍將并官健總

二百八十七人

卷三十五

十九

右臣得都將任從海及節級狀稱自赴征行已逾五載累曾沿海襲賊上江防虞去年軍都放迴本道從海等且在當府願隨行營者各得家信知四川已停衣糧伏緣從海等皆是貧寒更無營業彼處父母親屬便須委壑填溝請具奏論乞還衣糧者謹按史記釋云天子車駕所至則人臣爲僥幸賜人爵有級數或賜田租之半故因謂之幸也伏以任從海等萬里從戎五年于役不辭艱險願盡勤勞今者身在東吳職居西蜀此方苦於羈旅彼已停其衣糧遠路音書難寫征人之恨貧家親戚先懷餓殍之憂伏遇陛下

暫幸龜城去迴龍闕三川草木別有光榮萬戶烝黎
永能蘇息而任從海等久離本鎮不睹殊恩望雨露
之均沾恨烟波之迥隔固堪傷悵輒具奏諭伏乞聖
慈允臣所請特令本道卻給全糧所冀鳳駕巡遊士
卒皆知其有幸鴻慈煦育君親必表於無私謹具錄
奏聞伏聽勅旨

卷三十五

三

唐文拾遺卷之三十一

正日榮祿大夫三品頂戴前分巡廣東高廉道加四級臣陸心源輯
崔致遠

奏論抽發兵士狀

當道先准詔旨抽廬壽滁和等州兵馬其二
萬人仍委監軍使押領赴軍前者臣當時已
各帖諸州令排比點檢次又得進奏院狀報
近奉詔旨更於諸州催促兵士者

右臣伏以兵惟飾怒雖尙勇於戰征師克有和固推
誠於輯睦苟非得眾何以成功臣當管廬州與和州

卷三十六

一

舊有讎嫌至今疑忌唯謀以怨報怨未遂知和而和
孫端新授滁州又與秦彥有隙既是滁和接壤動有
他虞若於光蔡會軍必酬舊憾事非便穩理合奏論
臣自得招降多方控馭粗能禁戢免有動搖如令各
出兵戈必恐自相魚肉輒陳利害冀慎始終謹錄奏
聞伏聽勅旨

奏請叛卒鹿晏宏授興元節度使狀

右當道賀正子將許令琮等今日迴得狀稱三月
五日陳許軍潰散節級鹿晏宏領兵馬二萬餘人打
破金洋等州突入興元府坐節度使牛勗四日夜領

隨從人并家累約二千餘人奔投龍州西山山谷者伏
以天未悔禍地多受災旣當易動難安非可懲一勸
百鹿晏宏早駢散卒廣集叛夫始聆焚劫東都旋見
奔衝西路本道節度使周岌累令招諭終不歸降豈
興破浪之風但熾燎原之火今者逆黨則鯨吞盛府
元戎則鼠竄危途爪距已成根株難剗儻或未恕亂
常之咎別興伐叛之師卽恐終成一秦固應不利三
蜀且列藩貢獻諸道表章得達刀州皆由劍路況乃
鳳城已復鑾輅將旋縱令鴟鴞在天能摧狡窟若更
豺狼當道必礙行宮峽路雖通水程多慮不唯險阻
實且遐遙兼至上江皆爲賊境唯憂進獻莫遂通流
臣久竊寵光深懷驚憤遠詳事意輒具奏陳伏乞聖
慈霽雷霆之威迴雨露之澤速飛寬大之詔特委撫
綏之權鹿晏宏免致磨驚使當豹變必當克己永務
安人聖主含宏旣宥其窮斯濫矣奏臣警悟亦免於
尤而效之謹錄奏聞伏聽勅旨

進金銀器物狀

金器 銀器

右臣伏以烟塵向息道路猶虞每慙仗鉞之榮多曠
獻琛之禮得申遠貢唯有輕資前件金器銀器等質

變披沙形分鑄礫雖愧易盈之用且資虛受之功固
敢竭航波梯蠟之心助麟趾馬蹄之瑞貢金三品空
陳任土之宜望闕九重未遂朝天之願感恩何極戀
聖徒勤今差押衙王虔隨狀奉進謹進

進漆器狀

當道造成乾符六年供進漆器一萬五千九

百三十五事

右件漆器作非淫巧用得質良冀資尙儉之規早就
惟新之製雖有慙於瓊玉或可代於瑤瓶伏緣道路
多虞星霜屢換器貢難通於萬里綱行遂滯於三年

卷三十六

三

既失及時唯憂虛月臣今差押衙銀青光祿大夫檢
校太子賓客兼御史中丞上柱國辛從實押領隨狀
奉進謹進

進御衣段狀

當道先兼鹽鐵使織造中和四年已前御衣
羅折造布并綾錦等除先進納外續織造九
千六百七十八段謹具如後物色

右臣久權筮貨素乏籌謀多虧山海之資莫報雲天
之澤前件御衣并綾錦綺等薄慙蟬翼輕愧鴻毛然
而舒張則凍雪交光疊積則餘霞鬪彩既成功於鳳

杼希入用於龍衣儉德彌彰致美宜光於蔽冕皇恩
遠燭輸誠必鑒於絲毫其正段物等臣謹差某官某
押領隨狀奉進謹進

進綾絹錦綺等狀

進奉綾絹錦綺銀等一十萬正段兩謹具色
目如後物色

右臣伏以兵戈充熾郡邑凋殘仰思御輦巡遊唯恨
賦輿懸闕況乃當道巡屬之內招降頗多皆請占留
將充供贍貴息寇戎之患難豐進獻之儀前件綾絹
錦綺等雖製自鴛機而價慙鮫室篋謝入蠶之號劣
登三品之名祇將申任土之宜豈足備補天之用輕
微旣甚隕越何安其正段物色謹差節度散兵馬使
王審球等押領隨狀奉進謹進

賀入蠻使迴狀

右得進奏院狀報入南蠻通和使劉光裕等迴雲
南通和兼進獻國信金銀器物正段香藥信馬等漢
使傳詔則星迴象林蒙王奉琛則雲集龍闕能舉羈
縻之術果懷倔強之心若非聖上德叶棄瑕化敷柔
遠則何以感鑠耳鏤身之眾啟臙肝瀝膽之誠彼越
雉呈祥未爲盛觀旅獒入貢徒見良箴曷若正在艱

時能安獷俗使雲南酋長再遵奉贄之儀天下賢良
免獻征蠻之策斯皆相公魏絳陳利王商振威已今
六詔歸投卽使八紘清謐某比者南尋銅柱西鎮劔
關曾施上將之謀免辱大君之命令則遠聆盛事倍
切歡心陳賀末由無任欣抃云云

賀殺黃巢賊徒狀

右得進奏院狀報定難軍拓跋相公保大軍東方達
尚書奏於宜君縣南殺戮賊徒并生擒賊將又鳳翔
李相公奏探知京中賊徒潰散六月十三日聖上御
宣政殿排仗受賀者竊以逆賊黃巢稔惡旣多就刑

卷三十六

五

非久敢駢烏合之眾屢拒鷹揚之師拓跋相公東方
尚書或力微裔孫或曼倩餘慶皆申祕略共殄克徒
能順天誅遂陳月捷軍名定難雅稱關張之聲縣號
宜君克符堯舜之德是以聖上高臨紫極遠耀皇威
睹百辟之歡呼雷驚蜀國想六師之勇戰電掃秦川
卽當靜滅氛靈永見均施渥澤此皆相公調鼎中之
味運堂上之兵右援枹而得功左執律而至獻勳功
相繼稱慶何窮某久阻淮夷尙淹海徼遠聆捷語但
切歡聲然必願劔拂狼星旗迎聖日終繼張飛之拒
後不慙聶叔之致師限守戎藩未由陳賀下情無任

踴躍之至謹奉狀陳賀謹錄狀上

賀收復京城狀

右得河中節度使王司空牒報四月十日當道與鴈門節度使李僕射及都監楊驃騎下諸道馬軍齊入京城與賊軍交戰約殺賊步軍一萬餘人其馬軍賊便走出城黃巢亦未知存亡其逃遁賊徒尋差兵馬追奔並已收復京闕訖者伏以逆賊黃巢藏姦匿暴惡積禍盈久於輦下偷生固是檻中待死楊驃騎受聖君之重寄李僕射傳飛將之雄名既無慮於二心果有成於一力想其霜鋒電擊月羽風馳壓雀卵之

卷三十六

六

威高燎鴻毛之勢猛遂使賊巢困不能鬪亂無所歸雖爲漏網之鱗已是傷弓之翼則期加顯戮永掃羣寇加以能據六宮豕豕九陌今茲克復免致焚燒佇望翠華便歸丹闕稍豁上天之怒實除下土之灾此皆相公靜運廟謀遠揚戎略旣叶一匡之妙道北極何憂將流萬古之美談東封可俟某登壇有忝伏鉞無功遠聽歡聲始除慙色限拘守鎮陳賀末由下情無任抃躍之至謹錄狀上

賀月蝕德音狀

右伏見六月二十六日德音以太陰薄蝕曲赦三川

管內囚徒及委諸鎮收拾埋瘞京畿四面暴露骸骨者伏以金精隱耀玉辰垂仁蒼天誠以震驚省風謠而欽恤圜扉宥罪掃芻銷寃近鄙北齊號御囚而肆虐遠遵西伯葬枯骨以施恩蜀山之草木先春秦甸之煙塵永息此皆相公功成燮理道洽變通助日月之光輝振雲雷之號令八方翹首萬彙歡心某跡繫戎旃心馳台室阻隨班列莫遂歡呼下情無任抃躍之至謹奉狀陳賀謹錄狀上

賀內宴仍給百官料錢狀

右得進奏院狀報七月一日於內殿宴百官仍令度

卷三十六

七

支各給三箇月料錢并奉勅旨迴駕之日應沿路州縣切不得輒進歌樂及屠殺者伏以聖上繼周匡業避狄興憂自幸成都彌賚儉德守玄元之三寶達舜帝之四聰徹彼珍肴掛其素服言唯罪己事不勞人今日已復上京將迴大駕致柏梁之高宴盡醉千鍾鄙鍊布之乏財均頒九府然後繼飛綸翰仍命繡衣制郡邑之嚴科節道途之浮費既施令於好生惡殺亦停歡於八列九成王化斯行物情皆泰此皆相公手攜多士躬賀聖君篤行賦在鎬之章鳳藻詠濟汾之樂一時盛事萬代美談某限守藩條阻攀仙仗心

馳蜀棧目斷堯樽下情無任抃躍之至謹奉狀陳賀
謹錄狀上

請降詔旨指喻兩浙狀

右先准浙西周相公牒杭州與浙東兵士鬪敵某遂
具事由申奏請降詔書速令戢斂伏奉二月二十日
詔旨已詔兩浙務在叶和者某當時備錄王言各移
公牒訖兼先差人賫書牒與劉漢宏尙書詰彼起戎
之本諭其繼好之規今得迴書其言不讓唯稱周相
公與董昌苟恃寵榮妄行威福虐侵近境阻截通津
況有不同國之讎嫌又失無蘊年之誓約必想見豺
而戰猶能首鼠幸生已決加兵終期釋憾然則此無
和氣彼有鬪心嘗膽者結怨旣深抉眼者遺言可驗
必恐以吳興越終當有越無吳實所謂夫差之麋鹿
興譏范蠡之鼃鼃得便唯憂黎庶枉見殺傷輒再具
狀奏陳請更飛詔止遏某徒圓鑿方枘避柱觸楹累
陳高鳳之詞莫解子都之怒且讎因手足疾在腹心
久練師徒決期戰伐則也衛絲轉亂鄭蔓難除三人
是仇百姓何罪伏惟相公贊成睿略施展廟謀俾陳
兩武之事端唯仰一言之恩庇謹錄狀上

謝加侍中兼實封狀

右得進奏院狀報伏奉十一月十一日恩制加授侍
中仍加食實封一百戶者伏以某材輪美箭業紹良
弓早勤式遏之規敢怠聿修之訓遂得一分戎闡七
換師壇提漢法之重權陟秦官之極品恩榮獨盛績
効何申況自蠆尾之徒蝟毛而起神州傾陷御輦巡
遊不能踴躍用兵有類遷延之役雖進退惟命不敢
爭功而行藏相時豈無懷愧而又積山煮海瓜剖豆
分莫成贍國之權徒竊經邦之位唯甘廢棄永見沈
淪敢期渥澤之無私俯念涓埃之有效許登玉署高
戴金璫仍忝眞封式加懋賞且如講能奪席諫切引

卷三十六

九

裾方升鸞渚之榮俾稱鳳池之望豈伊孱劣所可貪
叨此皆相公仰贊萬機俯安九牧無使怨乎不以能
令可者與之唯當三命益恭一辭無退入則撫安疆
圉出則誓掃氛雲仁成滅寇之功冀贖曠官之責戎
鎮有限不獲陳謝下情無任感恩兢懼之至謹奉狀
陳謝謹錄狀上

謝落諸道鹽鐵使加侍中兼實封狀

右某伏奉去年十二月十一日恩制加授侍中餘並
如故仍加食實封一百戶落諸道鹽鐵使者伏以君
親委任固能捨短從長臣子志勤唯願從微至著某

一司推課六換暄涼正逢多事之秋莫展牢籠之用
況自煩更統帥別致租庸旣當狐讓千皮實見羊分
九牧贍軍富國固絕籌謀熬海鎔山幾墮條貫今者
聖上恕其不逮察以無私將漢法之重權委儒流之
妙術豈料更留宸慮猶念戎勳許登負璽之班資不
替擁旄之寵寄尙假極品重增實封當主憂臣辱之
時若斯榮盛審福過灾生之理何以遑安此皆相公
曲庇庸虛全忘僭忝俾息躬於負重當銳志於專征
宵無淬礪之功仰荅陶鈞之賜此外以榮爲懼至未
如初下情無任感戴兢惕之至謹奉狀陳謝云云

卷三十六

十

謝弟祝再除潁州狀

右件官是某堂弟今得進奏院狀報奉某月某日恩
制除金吾將軍被本州官吏眾狀舉留續准勅旨依
前充潁州刺史某嘗讀後漢書見寇恂爲潁川守後
拜金吾從上經過潁川郡人遮道願借寇君乃留一
年以慰百姓此實國家殊寵郡邑美譚萬代之來一
人而已誰知盛事得屬鄙宗安貧恤孤潁川之政化
雖乏出官入仕子翼之官資略同感深而喜作悲端
效淺而榮爲懼本伏以高祝粗閑吏術忝荷君恩分
憂而地壓劔關理俗而塵銷鈴閣今者纔升緹騎卻

擁朱輪謂施撫葺之能特徇眾多之請此皆相公愛
忘其短仁及於微仰贊帝俞俯從羣願某唯知提訓
俾愼揣摩同驅軾下之熊但期評理雖睹堂前之鷲
免恨分飛限守戎藩末由陳謝云云

請轉官從事狀

某官薛礪

右件官閔損登科良由德行陳琳從職實假詞華林
幽而轉識芝蘭木落而方知松桂深敦操尚夙著榦
能遠叨分闡之榮唯籍運籌之妙伏請轉官仍改章
服轉充觀察判官

卷三十六

十一

某官鄭倣

右件官早登上第久佐大藩能修檢慎之規每助撫
綏之政賓筵所重健筆爲先伏請轉官仍賜章服轉
充節度掌書記

某官顧雲

前件官東筠孕美南桂抽芳曳胡眺之長裾從衛青
之軍幕五殺皮之爲重豈謂虛譚百鷲鳥之不如方
知實事良資妙畫其展壯圖伏請轉官仍賜章服充
觀察支使 以前件狀如前伏以某遠率舟師誓除
國賊征帆則雲掛行色戰鼓則雷含殺聲留務旣繁

良籌是托或倚幕中之婉婉或求馬上之翩翩輒具
薦論仰希甄獎不拘月限別覬天恩伏惟相公庇護
戎藩激揚賓席稍超常例特受清資略假潤於丹青
許分榮於朱紫所冀元戎十乘速成討罰之功越府
三才各得施張之處已具狀申奏訖云云

滑州都統王令公

以下別紙

伏見制書伏承榮加內史之任暫執元戎之權往鎮
雄藩誓殲窮寇伫復宮闕則歸廟堂九重之倚賴如
山八表之歡呼動地而況令公志勤捧日力贍補天
三秉台衡兩分戎律人則建蕭何之功業出則振黃

卷三十六

十一

霸之恩威此皆羣議稱揚不假冊辭贊詠今者聖上
以叛徒乘便尙敢俯張諸道徵師互相逗撓蠢彼之
姦克未弭赫斯之憤怒良深遂輟股肱遠資心膂薦
敖宰楚設前茅後勁之規管仲相齊致九合一匡之
譽是以榮轉西臺左相請爲東道主人儒武全材古
今罕遇伏想近承睿略嚴令諸侯誠知白馬封疆幸
而獲賴必料蒼鵝羣黨困不能飛卽當立剗梟巢去
迎鑾駕海晏而永興龍德池清而再睹鳳儀凡在含
靈皆增係望某靜思奮擊動見悔尤四鄰多是異心
十道竟誰同力今所以自賀者得逢知己親總貞師

巧脣無所構之端壯膽有可傾之處唯冀遙稟大將軍之命用勵驍雄仰憑眞宰相之威永除妖孽未由陳賀下情不任欣慰攀虔祝云云

第二

伏睹制書伏承榮膺寵命正鎮雄藩伏惟感慰竊以動惟佐聖詩乃優賢百穀垂成則暫停霖雨八紘向泰則貴息兵戈詎勞有道之人久練不祥之器羣情旣鬱帝命斯行令公獨竭忠誠克扶厄運當六師扈從司南之制度無虧及十乘啟行逐北之威稜有裕但屬王事靡盬人心不同祖豫州志在誓江仁申壯

卷三十六

三

節蕭相國力謀佐漢或致游詞今以小寇必殲大臣于役慮失華夷之望倍興宵旰之憂遂乃鳳紙傳恩遠離西蜀蜂旗卷影卻到南燕指縱旣稟於成謀搏噬佇看於眾旅坐駟十道臥理百城顯爲出入之寵榮保就始終之勳業某夙銜深獎繼奉好音覽古人賀滿之言睹君子持盈之節抃慰攀戀不任下情伏惟云云

第三

伏承旌幢已到鎮上訖伏惟感慰令公手傾霖雨身耀福星三入廟堂已超仲父一匡寰宇更屬何人昨

者十乘啟行九重軫慮以爲瑩不勞海灌卯何假山
摧遂請元臣邵臨重鎮今則徐迴龍節靜撫雄師下
車而恩澤均沾舉扇而仁風廣振南燕受賜北極紓
憂某早荷獎知倍增欣慰云云

鄭畋相公

伏見二月六日制書伏承相公正居宏父光弼聖君
兼福蘭臺再調梅鼎凡云遠者近者莫不舞之蹈之
伏以相公碩德茂勳雄才奧學播在四方之口沃於
萬乘之心固絕贊揚但增瞻仰況自關中聚寇岐下
屯兵率先諸侯累展奇略是以才趨鳳輦便陟鸞臺
遠涉山川行就九天之寵克平水土坐升百日之榮
竹宮旣託於清規芸館更歸於雅望則乃孫叔敖之
慎守愈貴愈恭胡伯始之累遷有倫有要永憑上德
佇賀中興使仲父執鞭鄼侯捧轡驅蠹動入華胥之
域格蠻夷歸虞舜之風某早沐深知遠聆殊拜末由
陳賀抃聳倍深云云

卷三十六

古

第二

伏承太保相公累陳章表懇讓鈞衡暫輟任於股肱
果優賢於羽翼緇衣纘美青綬加榮守難進易退之
規叶居安慮危之道莫不宸展欽矚搢紳詠歌而況

相公比者統冠旬侯深攻國賊唱義聲而飛羽檄管
爵賞而練甲兵方驅破浪之風仁滅燎原之火而乃
腹心有疾牙爪無功何君子之見欺實小人之難養
然而災爲福始小往大來再秉洪鈞遠安仙蹕調鼎
中之實味運堂上之奇謀決勝漢籌弭災魏闕皆憑
蕭丞相指蹤之力豈假鮑尙書統集之兵咸推第一
之功能贊登三之業今則奉身有裕正足無虧將尋
疏傳之高蹤乃訪留侯之故事用黃石公之妙略蔚
爲帝師從赤松子之勝遊別作仙侶雖云獨樂其奈
眾情氛噎餘妖方願靜銷於天下陶鎔重望豈宜久
滯於山中必計才返鸞旌請歸鳳闕永使蜩螳罷噪
仍令鹿馬分形深荷眷私況聯親懿依攀禱望可鑒
遠誠拜賀末由悚戀增切云云

史館蕭邁相公

昨睹制書恭承高辭大計正陟中台兼升史館之榮
實副儒門之望竊以冊書所重筆削爲難別成一代
之楷模竄掩百王之規矩是得宸衷妙選朝列具瞻
而況相公眞君子儒老成人德允釐百揆顯贊萬機
今者邦計旣豐國經斯整東西臺之極位揚歷無遺
左右史之直言裁成有類莫不勳華表德游夏緘詞

能施補袞之功備載垂衣之化必使褻真貶僞彰發
傳之體有三激濁揚清勵事君之心無二古今盛美
遐邇欽依某遠守藩維忝資陶冶每慎六條之理敢
希一字之褒抃躍所多啟陳無及伏惟俯賜念察

度支裴徹相公

伏睹除書伏承相公再履台席榮均賦輿凡在生靈
莫非欣躍某今之所賀者真以天上之福與大國之
幸不欲更牽俗禮強飾繁詞然而歡心有餘祝史無
愧敢陳贊詠冀豁懇誠伏以相公德襲清通道資恭
儉歷遊華貫高陟台衡當聖君巡幸之初見賢相變

卷三十六

六

諧之業而乃鶴原陷難鳳閣辭榮暫屈跡於外藩尋
秉權於大計今者天將悔禍日待升平果請英才卻
歸舊位躡周司馬統兵之秩聘晉尚書較運之謀四
方所傳一意相賀某每慙薄伎偏荷殊私再逢調鼎
之期竇切彈冠之望未由陳賀但增攀戀聳抃之至
云云

租庸王徽相公

伏睹制書伏承榮膺寵命伏惟感慰伏以萬乘巡遊
最難留事百官毗倚允屬持綱況當返駕之時尤重
清宮之禮膺茲寵寄實在賢能司空相公靜抱長材

動施餘刃報主安人之業早冠鼎司東姦芟弊之名
已諧輿論今者鳴鳩命氏鷹隼揚威內清輦轂之塵
外肅關畿之地聖君新命永託中庸司隸舊章佇觀
大禮某忝承眷獎欣抃實深云云

前太原鄭從讜尚書

得河中王相國書報伏承相公榮膺寵命將赴京國
伏惟感慰伏以宸遊既遠居守是難須倚元臣方安
聖慮是故昔漢帝曰吾與僕射何異則知重寄別表
顯恩而況相公岳立儒宗川流相業頃辭鳳閣遠耀
龍旌郭伋示信之鄉廣沾恩化周舉移書之地遍活

卷三十六

七

疲羸肅軍令於貔貅振兵威於獫狁求安邊境胡雖
不敢南侵遽值妖氛周馥久勞西狩今以玉京雖復
鑾輅未迴輟戎略於藩垣託繁機於宮闕必計中和
樂職已繼雅音司隸舊章卽興盛禮然後重調梅鼎
永對奠階贊成天下之春固是穀中之事凡云品彙
莫不欣歡某早忝恩知倍增抃慰末由陳賀但切依
攀云云

禮部夏侯潭侍郎

命天

伏承榮膺寵命伏惟感慰侍郎泰初朗鑒日月難踰
孝若美資風塵莫染儒室別開其戶牖相門必繼其

弓裘是以始於憲府宣威便見儀曹主貢履歷而皆
遵仙路操持而永振貞風栢列朝霜昨日揖登臺御
史桂間夜月今朝選入室生徒採珠而蓬島待空投
玉而藍峰寡色副天下正人之願望息場中藝士之
屈聲某早沐眷私不任欣抃云云

吏部裴瓚尙書

伏承榮膺寵命伏惟感慰竊以勳華聖代唯務舉能
郭泰賢流共推取實用捨旣歸於重柄古今皆託於
長材人望所諧主恩斯在尙書情疎宦路性悅道風
月高而霜鶴數聲雲卷而蓮峯萬仞早知厄運久避

卷三十六

六

鬻氛洋川之瑞草仙花幾牽蝶夢閨苑之朝嵐暮靄
深潤豹姿然而陶鈞難住於山中塗炭待平於天下
遂辭肥遁來謁宸遊果登銓管之司允洽簪纓之望
昔年掌貢搜海嶽以皆空今日掄材酌淄澠而不混
清通所蒞滄亂必除厯居六郡之峻資終補三台之
缺位遠祈邇禱匪夕伊朝某早仰仙標遙欽懿範抃
慰瞻望不任下情云云

第二

伏以禮稱選士實資秀孝之科書貴知人允屬銓衡
之職君命旣將歷試物情固得僉諧而況侍郎雲鶴

性情天驥行止瓌窻近日高批帝語於筆端絳帳生
風妙選羣才於門下洎湖湘察俗滬洛尹都便宜入
秉化權坐匡聖略直以手能持滿心切避榮唯求勇
退之謀久阻急徵之詔萬乘夢思於隱霧四方渴望
於爲霖今者移黜陟之司託清通之鑒何假山濤之
密啟能遵李重之良箴永期涇渭分流必使輪轅適
用某每思玉昆金季皆辱眷知松茂竹苞深敦交契
禱祝瞻戀並同眾誠伏惟云云

宣歙裴虔餘尙書

伏承榮奉徵詔將赴闕庭伏惟感慶兼極今者妖氛

卷三十六

九

向息望運重興諸葛亮之用兵已非急務叔孫通之
制禮方籍賢才以尙書望積臬夔政成宛旬三年察
俗以仁義爲先四境懷恩俾寇戎之戢是得傅巖結
夢宣室飛書黎庶傾心莫遂攀轅之懇君王聳耳待
聽曳履之聲況乃親侍安輿榮趨帝輦仁聆調鼎永
使建囊豈獨關中义安實爲天下幸甚某久鄰仁境
深飽德風扑慰瞻攀不任誠懇云云

第二

特垂手筆榮函兼示陳情表藁捧尋無數欣賀有餘
且近者時風僅訛孝道多缺事親則薄奉己爲先只

將奔競榮身不以違離介意今睹尙書遠辭徵詔懇
致奏章敘向來爲國分憂不矜茂績請從此於家就
養實稟格言況尙書若赴行朝必登相位而乃不親
梅鼎願奉板輿是逃台袞之榮唯戀斑衣之樂永使
李密之表萬古齊名仍令束皙之詩千秋長價有以
見聿修令問橫勵時流豈唯上德之美譚實乃中興
之盛事拜賀末由但切攀依之至云云

鹽鐵李都相公

伏承榮膺寵命兼掌漕運伏惟感慰伏以鑄山熬海
旣標富國之權紫帳皂檐固是安邦之彥況從多事

卷三十六

二十

諒託全才相公中庸日彰大任天降舟楫暫妨於援
溺棟梁必俟於扶危今者三年禮成萬乘恩至假途
端揆正位司元憑孔僅之智謀繼齊桓之霸業必也
廣施奇計遍致豐資答上帝之殊恩振中興之盛事
凡云彙孰不欣歡某每慙糠粃居前久阻鹽梅入
用主張多失固難稱老成人交代叨榮無以告新令
尹抃慰競惕不任下情拜賀末由攀戀空切云云

資實第二

每辱榮緘卽垂虛譽周顛齊名於樂廣固是懷慙韓
非接傳於老聃實爲過望荷戴增切兢惶益深伏以

相公宋劍倚天魯戈駐日再居重任大洽羣情必計
海若傾心廣潤煎熬之利山靈効力助成鎔鑄之功
便令流馬飛牛終得踰千越萬國用則立期饒美廟
謨則坐致昇平勤王之誠在我而已伏惟尊護用慰
禱祠其他下誠已具前狀云云

卷三十六

一



輒願其說不類曰具前狀云云
刻眼坐筵昇平樓王玄始亦處而曰為新
則令流馬飛牛終得踰千越萬國用則立期饒美廟
謨則坐致昇平勤王之誠在我而已伏惟尊護用慰
禱祠其他下誠已具前狀云云

